

TOP-UP & WIN YOUR DREAM CAR



Worth of K25,000 every month

*Check internet features for more details

24/7 Customer Care Call 343 4799 or www.telikompng.com.pg

SEVEN HANDRET TAWA NA SANAPIM MOA YET
Digicel, konektivim PNG

Ol yuni sumatin soim rot

LASPETA taim ol sumatin bilong Yunivesiti bilong Papua Niugini i bin go atermen Gavman long rait bilong ol manmeri, sampela bilong ol i bin dai. Tasol long las wik, ol i opim maus bilong ol gen taim Gavman i mekim wanpela loa we ol sumatin na planti manmeri long kantri bilip i no stret. Ol i mekim wanpela protes mas i go long opis bilong Praim Minista long Morauta Haus na givim wanpela petisen pepa long askim Gavman long senisim dispela loa gen.

Moa stori long dispela Pes na insait.



RAIT: Nou Vada (namel), i holim wanpela petisen we ol sumatin i bin karim i go long Morauta Haus las wik long askim Gavman long rausim dispela loa.

POTO: Nicky Bernard.




SCAN HERE

Call 123 for more info
www.digicelpng.com

Digicel

PNG's Bigger, Better Network.

KLOSTU NAU!

29

De moa...

Enrol NAU!!



ELECTION COMMISSION 2012 VOTE LPM

ol yuni sumatin stopim skul

OL SUMATIN bilong Yunivesiti bilong Papua Niugini (UPNG) bai stopim skul, maski yunivesiti administresen i no givim tok orait.

i go long pes 2



...the perfect choice

VITAMIN ENRICHED

More Easy, More Tasty, More Healthy.



TELI Apdeit

Tok klia long SMS Data na Vois Top-Ap

Telikom PNG i autim SMS Vois na Data top-ap bilong ol pripeit kastoma bilong en.

SMS Vois top-ap

Risasim Vois Akaun Bilong Yu

1. Sikirapim rausim silva panel long baksait bilong Telikad/Rait Kad namba long painim 12-pela dijiti namba.
2. Opim nupela SMS
3. Taipim V bilong vois; bihain taipim * na bihain, Telikad/Rait Kad Namba
4. Salim i go long 1257
5. Wet liklik long kisim SMS bekim

Olsem: Taipim (V*xxxxxxxxxxx) salim i go long 1257

Yu bai kisim wanpela SMS we i tok klia long balens long akaun bilong yu

•Sekim Vois Balens bilong Yu

1. Opim wanpela blenk SMS
2. Salim i go long 1256
3. Wetim balens bekim bilong yu

SMS Data top-ap

•Risasim Data Akaun Bilong Yu

1. Sikirapim rausim silva panel long baksait bilong Telikad/Rait Kad long painim 12-pela dijiti o namba
2. Opim nupela SMS
3. Taipim D bilong data; bihain taipim * na taipim Telikad/Rait Kad Namba, bihain * na Data yusa namba bilong yu.
4. Salim i go long 1257
5. Wetim SMS bekim bilong yu

Olsem: Taipim (D*xxxxxxxxxxx*xxxxxxxxx)

Yu bai kisim wanpela SMS we i tok klia long balens long akaun bilong yu

Sekim Data Balens Bilong Yu

1. Opim nupela SMS
2. Salim i go long 1256
3. Wetim long kisim bekim long balens

Ringim 24/7 Kastoma Kea long 3456789



NOGAT ROT

LONG belo long Trinde (aste), rot hevi long Simbu provins i daunim dispela Dyna trak taim em i traim krungutim han rot bilong ol liklik kar long go long hapsait rot. Turangu trak ya i asua olgeta na hevi tumas na rot i bruk gen. Ol wokman i wok long tuhat long stretim gut rot bai dispela hap seksen i orait gen long kisim ol bikipela kar pastaim long wiken.

Poto na Stori: Pater Philip Gibbs, SVD

Glasing Judisal Kondak Bilong

PAWA bilong nupela Judisal Kondak loa bilong was long ol Nesanel na Suprim Kot jas i kirap pinis long Novemba 1, 2011.

Maski loa ol i mekim las wik tasol, palamen i ken bihainim dispela loa long rausim ol jas husat palamen i

ting em i gat asua long wok bilong en.

Bihain long planti manmeri, ol yunivesiti sumatin, ol save man bilong loa, arapela memba bilong palamen, na wok manmeri bilong kot i les long dispela nupela loa, Praim

Minista, Peter O'Neill, i makim Memba bilong Maprik, Gabriel Kapris, kamap siaman bilong Konstitusanel Loa Rifom Komisen, long tokim ol pipel long gutpela bilong dispela loa na long kisim moa ting ting bilong ol pipel.

Kapris i tok dispela loa bai nonap wok hariap tasol, Sir Salamo Injia, i mas lusim sia bilong Sif Jastis na larim ol polis i mekim wok painimaut long ol sut tok tok bilong en long kamapim pasin korapsen insait long kot haus.

YUMI nau lukim wanem samting palamen na gavman i bin kamapim long Novemba 1 i kam i nap nau.

Novemba 1, 2011

Ol ami i bin brukim kar long opis bilong Praim Minista Morauta Haus long pinis pe mani bilong ol

Novemba 2, 2011

O'Neill i kam bek long Komonwel miting (CHOGM) long Perth, Australia.

Novemba 3, 2011

Sir Anold Amet i kisim tokwin olsem gavman i tingting long rausim Sif Jastis, Sir Salamo Injia na ol arapela jas bilong Nesanel na Suprim Kot. Em i bin givim tok lukaut lon gavman long noken daunim kot bikos dispela i ken bagarapim kantri.

Novemba 11, 2011

Taim Praim Minista, Peter O'Neill i bin go harim APEC miting long Hawaii, NEC i bin saspendingim o rausim Sir Salamo bikos long sampela sut toktok gavman i bin harim. Gavana Jeneral i bin givim tok orait long sainim gavman geset long rausim em bihain long em i kisim edvais o toktok i kam long ekting Praim Minista, Belden Namah na Jastis na Atoni Jeneral, Dokta Allan Marat. NEC i bin tok Sir Salamo i bin kisim potnait mani tupela taim, i no yusim gut mani bilong kot, paulim mani bilong haus mani bilong wok manmeri bilong kot na kontemp sas bilong

sakim kot oda bilong Jastis Sevua.

Novemba 14, 2011

Jastis Bernard Sakora i bin tokim polis long holim o aresim Namah na Marat bikos tupela i kamapim kontem bilong kot. Sakora i bin askim Polis Komisina, Tom Kulunga, long holim tupela bikos taim Spesol Refrens bilong painimaut husat i trutru paim minista i no kamap yet, tupela i bagarapim gutpela wok bilon kot wantaim disisen bilong rausim Injia. O'Neill i stap yet long Hawaii na i bin givim bel isi toktok long kantri.

Novemba 15, 2011

Polis i no bin holim Namah na Marat yet tasol tupela yet i bin go daun long polis hetkwata long Konedobu na bihain go insait long Boroko Polis sel na kamaut long polis beil. Tupela i tok tupela mekim dispela long soim olsem nogat wapela man i stap antap long loa.

Novemba 16, 2011

O'Neill i bin kambek long kantri. Em i sapotim toktok bilong Namah na tok nogat wanpela man i stap antap long loa. Namah na Marat i askim kot long rausim kot oda bilong holim tupela tasol, tasol Suprim Kot i bin sasim tupela aninit long kontem bilong kot, na tokim tupela long peim K5000 beil.

Disemba 9, 2011

Loya Philip Ame i makim maus bilong O'Neill na askim Suprim Kot long rausim Sir Salamo Injia long kamaut long sia na larim ol arapela 4-

pela jas tasol i givimaut disisen. Ame i tok 3-pela witnes man i bin lukim Sir Salamo toktok wantaim Arthur Somare long Ela Beach Hotel insait long hap bilong pilai poka long 2-kilok biknait. Palamen i mekim nupela loa na rausim Sir Michael lon sia bilong Is Sipik.

Disemba 12, 2011

Sir Salamo i tok Ame i bin giaman long tok em i lukim Sir Salamo long hotel long 2-kilok biknait. Long 6:30 apinun, Sir Salamo wantaim arapela 4-pela jas i bin givimaut disisen bilong Suprim Kot Spesol Refrens, we ol i bin painimaut olsem Somare em i praim minista yet.

Disemba 22, 2012

Palamen bin kamapim nupela loa long kris-mas bilong praim minista. Memba husat i abrusim 72 yia bai nonap kamap praim minista.

Mas 7, 2012

Polis i bin holim Sir Salamo Injia, kisim em i go daun long Konedobu Polis Hetkwata, na sasim em long em i no bin bihainim kot oda na holim bek haus, graun na mani bilong pikinini man bilong leit Jastis Timothy Hinchcliffe, husat i dai pinis.

Mas 21, 2012

Palamen kamapim nupela Judisal Kondak loa bilong was long ol jas bilong Nesanel na Suprim Kot. 63 memba i vot long larim dispela loa i kamap na 7-pela memba i les long em i kamap loa.

Ol Sumatin stopim skul

I kam long pes 1

Bihain long Praim Minista, Peter O'Neill, i no bin bekim gutpela toktok long petisen ol i bin givim long gavman las wik Fraide, ol bai nau stopim skul.

Presiden bilong UPNG Sumatin (SRC), Emmanuel Isaac, i tok : "Dispela disisen bilong stopim skul i kamap wantaim sapot bilong olgeta sumatin bihain long mipela i toktok long Forum Skwaia, we mipela i bin givim inap sans long olgeta sumatin lida bilong ol wan-wan provins

long tokaut long tingting bilong ol."

Isaac i tok ol yunivesiti sumatin bilong Lae Yunitek tu i sapotim ol long askim gavman long rausim dispela loa bilong was long jas.

"Mipela i tok tenkyu long sapot i kam long ol arapela NGO na Sivil Sosaiti grup. Ol arapela tesieri skul na yunivesiti long kantri tu bai stopim skul bikos ol i sapotim mipela. Mipela i mekim dispela long gutpela bilong dispela kantri," Isaac i tok.

Niles bai kisim Dokta digri long UPNG greduesen tumora

NAMEL long 1,230 sumatin long Yunivesiti bilong PNG (UPNG) bai greduet tumora, Fraide Epril 1, wanpela man bai kisim doktoret bilong em olsem Dokta bilong Filosofi.

Dokta William Niles em Ekting Dairekta na Sinia Etnomusiolojis long Institut bilong PNG Stadis bai kisim Dokta digri bihainim risets long tumbuna musik na danis bilong Maun Hagen eria long Westen Hailans provins.

Dokta Linus digim'Rina bilong UPNG Antropoloji na Sosioloji skul wantaim Alan Rumsey bilong Antropoloji Dipatmen bilong Australian Nesanel Yunivesiti i bin glasing ol wok bilong em.

Long 1,230 lain bai greduet, 80 bai kisim ol pos greduet digri na 1,140 bai kisim greduet long namba wan taim.

Dispela em i namba 57 greduesen bilong UPNG.

Greduesen bai kamap long tupela hap. Long moning, ol lain i skul long Bisnis Edministresen, Humentis, na Sosel Saiens bai greduet taim Skul bilong Marasin na Helt Saiens, na Loa bai greduet long apinun.

Wanpela sinia stetsman bilong kantri, Se John Kaputin wantaim presiden bilong PNG Bisnis Kaunsel, Ernie Gangloff, bai ol ges spika. Tupela bai toktok long glasing we ol bisnis, gavman na pablik i save gat long ol lain i pinisim skul long ol yunivesiti.



Jessica kam long helpim

WANPELA yangpela musik asples meri bilong Darwin, Australia, i bin stap long Mosbi long dispela wik long resim o kamapim mani bilong helpim 2012 Operesen Open Hat na PNG Okid Sosaiti. Moa long 60 pikinini long PNG i gat sik na hevi long lewa bai kisim operesen long stretim ol na ol i ken kamap orait na go hetim gut laip olsem ol narapela manmeri husat i nogat dispela kain hevi. Jessica Mauboy i gat 21 krismas na i bilong Noten Teritori, Darwin, Australia nau em i beis long Atlanta, Amerika, we em i go hetim wok bilong em olsem

musikmeri. Jessica i gat nem long Australia wantaim namba wan singin albam bilong em, Been Waiting, we i bin kisim gut mani taim planti pipel i bin laikim ol singsing bilong em na ol i baim. PNG Okid Sosaiti na Air Niugini i bin wok bung wantaim long kisim dispela biknem yangpela musik meri i kam long PNG long helpim kamapim mani long tupela ogenais-esen em wanpela, Operesen Open Hat, i save sevim laip na givim ol sekons sans long stap laip bilong planti ol pikinini long PNG.

SAY NO TO PLASTIC BAGS



WIN CASH PRIZES



Plastic bags damage our planet, choke waterways, litter the countryside and kill wildlife.

Say Yes to PNG's environmentally friendly solution and create your own BSP branded bilum bag or basket. It could win you a cash prize and help save the environment.

The Competition

BSP is inviting everyone to enter for a chance to win great cash prizes by creating a traditional woven bilum or basket made with natural fibre.

Eligible entries must have;

1. The BSP lime green Logo; or
2. the BSP lime green colour; or
3. the text "BSP Go Green"
4. to be original and creative
5. to be woven traditionally.

The Prizes

There are great weekly & major cash prizes. All entries receive BSP merchandise.

10 weekly winners

receive **K100** each
(50 winners over 6 weeks)

10 major winners

receive **K2000**
each + a beach umbrella

All weekly winners will be in the running for the major prizes

Competition **Starts 20th February** & all entries should be submitted by **April 30th**. Weekly prizes announced April 5th, April 13th, April 20th, April 27th, May 4th and May 11th. **Major Prizes announced May 18th**



Find Us On

Another BSP Go Green Initiative 2012

ENTRY FORM

Drop your completed entry form into your local BSP Branch.

Name: _____

Age: _____

Gender: _____

Email: _____

Mobile No: _____

Address: _____

Town: _____

Province of origin: _____

BSP Acc No: _____

If not a BSP customer, provide proof of identification to claim prizes

Sign: _____

I have read & agree with the competition terms & conditions.

Terms and Conditions

1. To enter and be eligible, entrants must complete the official entry form, completing all relevant details
2. Entries must comply with the criteria of the competition
3. By entering the competition, entrants give BSP the ownership of the entry, which may include a bilum, basket and craft created in the criteria
4. By entering the competition, entrants agree and acknowledge that they may be contacted by BSP for promotional purposes
5. Entrants may enter the competition only once and must submit original work
6. Entrants can only enter the competition in their own name and not on behalf of someone else
7. Eligible entries received will be judged by a panel of BSP representatives in accordance with the criteria
8. Staff and their immediate family members (brother, sister, grandchild) cannot enter, children are no exception
9. Winning entrants must provide proof of identification to claim prizes

Go Green for Sustainability
Visit our website for more details

Niupela Maggi Magic Teist

Wanpela kain kuing pauda

Bai givim BEST teist long kainkain kuk

We have sold our souls to the Devil

WE have just witnessed our Chief Justice being arrested at gunpoint by armed thugs calling themselves "members of the Royal Papua New Guinea Constabulary".



can no longer walk around safely at night except for Highlanders. And if our policemen are as efficient as they have demonstrated in their arrest of the Chief Justice, then one must ask why they cannot apprehend so many rapists, murderers and armed bandits who roam around freely in our towns and cities in this country?

Does the Police Department have lawyers who can advise the Commissioner when to charge a person for perverting the cause of justice? One does not have to be a lawyer to work out that a charge of perverting the cause of justice only applies in a situation where the person charged has, in effect, interfered with the criminal justice system by either destroying evidence, advising witnesses to tell lies, or not to testify, or in some way interfering with the conduct of criminal proceedings.

In the common law countries, of which

PNG is one, having adopted the English Legal System, nobody gets charged for perverting the cause of criminal justice in a strictly civil matter such as that alleged against both the Chief Justice and the Registrar of the National and the Supreme Court.

This is total abuse of police powers which in effect amounts to breaches of the Constitution.

This is a matter of public interest because it is all about the policemen who, having sworn oaths to protect persons and property and to uphold the Constitution and the rule of law, have chosen instead to disregard their oaths to seek out the Chief Justice and the Registrar to exercise their powers of arrest and detention. Not for breaches of the criminal justice system; but for political purposes to please their political masters.

If Peter O'Neill and Belden Namah are behind this move by police to arrest the Chief Justice and the Registrar of the National and the Supreme Courts, then we would like to ask these two gentle-

men: 'What is wrong with you two? And how mighty and powerful do you two want to be? You both are already the Prime Minister and the Deputy Prime Minister respectively, so why are you not satisfied with that? Why do you two have to go out of your way to flex your muscles further? And what end would that serve? Is this simply an exercise to service your egos? And what is the justification for going to arrest the Chief Justice while fully armed with high powered guns? Was there any suspicion that the Chief Justice might be fully armed as well?

Either rightly or wrongly, you guys are now in power in this country. And rightly or wrongly, the bulk of people have accepted you as the government of the day.

In effect, with your promises for free education and free health, you have bought and the people at large have sold their very souls to you, so we suggest that you find peace within yourselves to maintain your positions in government until after elections, and if you are

successful there, then that would mean another term in government for your mob.

Thus, we suggest that all this nonsense be stopped and that the present mob continue their term of office until the elections and the writs are returned. It is unnecessary to terrorize people simply because they think differently and say things differently. Is that not what democracy is all about?

It is said that democracy is a rule by the majority, but let us add too, that in a responsible democracy, the minority is allowed to air its views or dissention without fear, and it is a sign of matured leadership not only to tolerate the minority but also to afford the minority the forum to air its views.

Is this not the PNG way of doing things by way of public debate? And why should that change simply because Peter O'Neill and Belden Namah are now in power?

Is Papua New Guinea now heading into dictatorship? Over to you O'Neill and Namah!

Yumi paia wut bilong Satan pinis

MIPELA i lukim pinis Sif Jastis bilong mipela, ol man i holim gan na kolim ol yet "ol memba bilong Royal Papua Niugini Konstabulari" i holim em.



no pilim sef moa long wokabout fri long nait? Ol Hailans tasol i save strongim tingting na wokabout long laik.

Na sapos ol polisman bilong yumi em ol trutru man bilong wok, olsem ol i soim taim ol i arestim Sif Jastis, orait, yumi mas askim watpo ol i no holim yet planti ol repis man, ol medera o man i kilim arapela man, husat i wok long raunraun nating long planti ol taun na siti long dispela kantri?

Polis Dipatmen i gat ol loya man husat i ken stiaim Komisina long taim bilong sasim wanpela man long paulim wok jastis? Mipela no loya, tasol mipela i ken luksave olsem dispela hap tok 'perverting the course of justice', em i sut long wanpela sindaun we man ol i sasim, em i paulim wok bilong kriminal jastis sistem, taim em i kukim o rausim na haitim evidens, stiaim ol witness long tok giaman, o noken testifai, o long sampela rot we i pasim wok bilong kot o jastis.

Insait long ol komon lo kantri, we PNG em i wanpela long ol bikos em i bihainim Inglis Ligel Sistem, nogat wanpela man i save kisim sas long paulim wok bilong kot insait long wanpela sivil kot olsem dispela, i agensim Sif Jastis na Rejistra bilong Nesenel na Suprim Kot.

Dispela em i paulim tru pawa bilong polis, we em yet nau i go agensim Konstitusen o Mama Lo.

Dispela em i samting bilong pablik long save, bikos em i sut long ol polisman, husat i mekim pinis ol tok promis bilong strongim Konstitusen na lo, na husat i no luksave long ol dispela tok promis, long painim Sif Jastis na Rejistra long yusim pawa bilong ol long arestim man na holim em. I no bikos em i brukim wok bilong kriminal jastis sistem; tasol long pilai politiks na amasim ol politikal lidaman bilong ol.

Sapos Peter O'Neill na Belden Namah i stap baksait long dispela wok polis i mekim long arestim Sif Jastis na Rejistra bilong Nesenel na Suprim Kot, orait, mipela i laik askim dispela tupela man long dispela askim:

'Wanem hevi bilong yutupela? Na yupela laik kisim wanem kain strong na pawa moa? Yutupela i praim minista na deputi praim minista, na yutupela i no inap yet? Watpo yupela i go gen na soim masol bilong yutupela yet? Na em bai kamapim wanem? Nogut em i kamap long strongim pasin yupela i gat long laikim yupela yet?

Na wanem as tru long go na arestim Sif Jastis wantaim ol bikpela pawa gan? I bin i gat sampela tokwin olsem Sif Jastis tu bai karim ol bikpela pawa gan?

Maski em i stret o i asua, yupela nau i stap long pawa long kantri. Na rait o rong, bikpela namba bilong pipel i wanbel na givim luksave long yu pinis olsem gavman bilong tude.

Tru tumas, wantaim ol tok promis bilong yupela long fri eduken na fri helt sevis, yu baim pinis sol bilong olgeta manmeri long kantri, olsem na mipela i tok olsem yupela yet i mas painim bel isi long yupela yet na holim strong wok yupela i holim nau long gavman, inap bihain long ol ileksen, na sapos yupela i winim vot gen, em bai narapela tem bilong yu na ol mobs bilong yu.

Olsem na mipela i tok olsem olgeta dispela pawa pilai i mas pinis nau, na gavman i stap nau i go het inap long taim bilong ileksen na ol rit i go aut na kam bek. I nogat as long go na pretim nating ol manmeri bikos ol i gat narapela rot bilong skelim samting, na narapela kain nek long tromoi toktok. Em i pasin tru bilong demokrasi, laka?

Ol i tok demokrasi em i rul bilong majoriti, o husat i holim moa namba, tasol mipela i laik tok tu, olsem insait long wanpela strongpela demokrasi, mainoriti, o ol lain i nogat bikpela namba, i gat rot na sans bilong autim tingting bilong en, na em i mak bilong gutpela lidasip, long orait long en, na tu, long givim spes na sans long ol mainoriti long autim tingting bilong ol.

Em i no we PNG i save mekim samting? Long pasin bilong tokpait long pablik? Na watpo bai yumi senisim dispela pasin demokrasi bikos Peter O'Neill na Belden Namah nau i holim pawa?

Papua Niuginiu nau i wok long go painim diketasip? I go bek long yutupela, O'Neill na Namah!

Sapos Polis Komisina Kulunga na ol polisman bilong em i soim strong bilong ol long mekim wok bilong ol, watpo na long Mosbi na ol arapela ples long kantri, ol manmeri i

Kala piksa ken kirapim intres na opim tingting

James Kila i raitim

WANPELA gutpela rot long bringim infomesen long sait long helt na edukesen em taim yu yusim moa piksa we I gat naispela kala na stori long en.

Dispela ol kala piksa bai bringim moa intres na tu opim tingting bilong ol lain husat I intres o laikim tru long kisim infomesen long helpim sindaun bilong ol insait long femili na wan wan haus-lain na viles komyuniti bilong ol.

Insait long wanpela helt awenes I no long taim I go pinis long makim Apex Nesanel

Helt Sefti Wik, ol Komyuniti Afes na medikol tim bilong Ramu NiCo I bin bringim planti ol piksa buk we I gat stori.

Arapela samting tu em olsem wanem ol teknikal infomesen o wanem kain toktok insait long ol piksa stori buk I mass tap long tokples we planti lain I save na I ken ridim gut. Long helpim ol ples lain em I moa gutpela long ol infomesen I stap long Tok Pisin, we planti lain husat I ridim bai I save gut tru.

Long dispela aweanes long ples Jangang, klostu long Basamuk

Rifaineri bilong Ramu NiCo long Raikos distrik, ol CA na medikol tim I yusim gut tru ol piksa buk long bringim na holim strong intres bilong ol lain husat I go bung.

Dokta Pamuso Warimo I mekim gutpela toktok long aweanes wantaim arapela nes-meri Helen Bruno long opim tingting bilong ol sumatin na liklik pikinini long ples long sait long helt edukesen.

Planti ol pikinini I amamas tru na askim planti gutpela kwesten na kisim gutpela bekim long ol dispela medikol lain bilong Ramu NiCo.

Strongpela dring bagarapim bodi

Veronica Hatutasi i raitim

.ALKAHOL o strongpela dring em i wanpela drag we i ken bagarapim bodi na kamapim hevi long tingting, stap na laip bilong manmeri sapos ol i no ovarim mak na i no yusim gut.

Bikmeri bilong Mental Helt Dipatmen wantaim Nesanel Dipatmen bilong Helt, Dokta Ambi Uma, i bin tok olsem long tupela de "Alkohol Abius" woksop long Mosbi long dispela wik.

Loa na Jastis sekta i bin go pas long dispela woksop we ol lain i makim ol ogenaisesen i lukautim loa na oda long kantri olsem polis, Koreksenel Institusien Sevis (CIS), ol skul, ol sios, Sivil

Sosaiti Ogenaisesen, ol meri lida, ol lain i makim helt dipatmen long provinsel na nesanel level na ol narapela moa, i bin stap long en.

Ol lain i bin glasim ol wok kamap bihainim namba wan bung olsem i bin kamap long las yia na wanem ol wok go het i kamap. Na wane mol samting ol bai mekim long edresim na daunim ol hevi we ol manmeri i kamapim taim ol i kisim nogut ol strongpela dring.

Dokta Ambi i tok tai mol man na meri i kisim ol strongpela dring olsem bia na ol spirit, em i save kamapim ol bagarap long bodi bilong man, mekim ol man na meri i laikim moa na laip bilong ol bai no inap stap gut na ol i

mas kisim ol strongpela dring, na em i save kamapim ol kensa na ol laipstail sik. Na tu, sik long tingting o kru bilong man.

"Ol sik we dringim strongpela dring planti i kamapim long tude em lonmg ol kain sik kensa, ol wari na tingting tumas bai mekim man meri i no stap gut na ol laipstail sik long lewa, sik suga, daunimj strong bilong bodi long pait agensim ol sik na moa.

"Olsem na yumi mas lukautim gut yumi yet na yusim gut het sapos yumi laik dring.

"Sapos yumi yusim krangi alkohol, bai yumi kisim ol kain sik, lusim ol famili bilong yumi na ol gutpela samting yumi gat long en," Dokta Ambi i tok.



Dokta Warimo bilong Ramu NiCo i soim piksa na givim stori long helt aweanes

Skul long Japan

GAVMAN BILONG JAPAN (MONBUKAGAKUSHO:MEXT) SKOLASIP BILONG 2013 I OP NAU

Gavman bilong Japan i givim tripela kain skolasip olsem: Spesolais Trening, Andagraduet na Risets Stadi, long ol Papua Niugini manmeri i laik skul long ol Spesolais Trening Koles o Yunivesiti long Japan.

Ol autlain bilong ol wanwan kategori i olsem:

- 1) **OL SPESOLAIS TRENING KOLES SUMATIN** (3-pela yia)
Ol Spesolais Trening Koles i save givim vokesenal edukesen na Skolasip taim i karamapim 1 yia preparatori edukesen long tokples Siapan. Ol Apliken i mas pinisim Gret 12 (o bai pinisim Gret 12 long mun Mas 2013) na de mama i karim mas namel long Epril 2, 1991 na Epril 1, 1996.
- 2) **OL ANDAGRADUET YUNIVESITI SUMATIN** (5-pela yia)
Skolasip taim i karamapim 1 yia preparatori edukesen long tok ples Siapan. Ol Apliken i mas pinisim Gret 12 (o bai pinisim Gret 12 long mun Mas 2013) na de mama i karim mas namel long Epril 2, 1991 na Epril 1, 1996.
- 3) **OL RISETS SUMATIN** (1 na hap yia o 2-pela yia)
Bilong ol Yunivesiti graduet husat i laik mekim wanpela Risets Kos o wanpela Mastas Program (i mas i gat inap long 16 yia skul) o doktoral kos (i mas i gat skul inap long 18 yia). Skolasip taim i karamapim 6-pela mun long preparatori edukesen long tok ples Siapan. Mama i mas karim ol long Epril 2, 1978 o bihain long en.

Ol Aplikesen fom na infomesen pepa bai redi long Embasi long namel bilong mun Epril 2012 inap long Jun 1, 2012.

Ol aplikesen fom yu pulapim wantaim olgeta pepa, wanwan manmeri i ken go givim, o yu ken salim long pos opis i kam long Embasi pastaim long Jun 15, 2012.

Long kisim moa tok klia, plis ringim Luddy Sallun o Dorothy Toredau long Telepon: 3211800, Feks: 3212278 o salim pas i kam long:

Embassy of Japan, Scholarship Section
(Ground Floor, Cuthbertson House, Port Moresby)
PO Box 1040, PORT MORESBY, National Capital District

Email: eoj2@online.net.pg Attention: Scholarship



Statim alkohol awenes skul long famili na praimer skul

Veronica Hatutasi i raitim

SKUL na awenes i go long ol pikinini long ol nogut na gutpela bilong strongpela dring, na ol hevi we strongpela dring i kamapim, i mas stat long famili haus, na tu, long praimer skul level.

Man i bin makim Laga Industris long tupela de Alkohol Abius semina long Mosbi las wik i tok.

Long wankain taim tu, dispela mausman bilong Laga Industris, wanpela long ol 5-pela kampani long PNG i save wokim ol strongpela dring, i bin tok kampani bilong em bai givim sapot long edukesen awenes we ol ogenaisesen i laik karimaut ol wok awenes long ol gutpela na nogut bilong alkohol o strongpela dring.

Ol man i makim ol loa meka olsem polis, Koreksenel Institusen Sevis o CIS, ol Sivil Sosaiti Ogenaisesen, Helt Dipatmen, sios, meri na skul i bin stap long kamapim na bungim tingting long edresim ol sosel na loa na oda wari na hevi na kantri bilong yumi bai gutpela long pipel i stap long en.

Olsem Dairekta bilong PNG Loa na Jastis Sekta, Joe Kanekane i tok, "hevi we kisim strongpela dring krangi abrusim mak o "alkohol abius" i kamapim i go nogut.

"Na mipela i traim long edresim hevi long ol haus kalabus i pulap, ol sosel hevi na moa, na mipela bai wok wantaim Dipatmen bilong Provinsel Afeas na ol narapela ejensi na ogenaisesen long lukim olsem pipel long dispela kantri i stap long seif, jas na gutpela sosaiti.

"Tasol em bai kisim sampela taim long edresim dispela samting," Mista Kanekane i tok.

Em i tok dispela em i stat bilong longpela wokabaut we PNGLJS i bin statim long las yia long wok wantaim ol patna na bungim ol tingting long ol rijen bilong dispela kantri na redim long givim i go long gavman bilong helpim long kamapim ol loa long dispela eria.

Planti totkok i bin kamap we ol lain i toktok long tupela de bung i tok drin g bia i no wanpela hevi, tasol ol man yet husat i yusim krangi strongpela dring na spak longlong na kamapim ol hevi, kros, pait na bagarap long komyuniti na sosaiti.

"Yumi olgeta i gat wok long mekim na i moabeta yumi sanap wantaim long painim ol rot long daunim ol hevi we kisim krangi strongpela dring i save kamapim.

"Edukesen wantaim skul awenes na strongpela loa long givim laisenswe bai putim kontrol na tu, kamapim wanpela bodi bai go hetim ol wok long lukautim ol samting i sut long alkohol abius i mas kamap.

"Pasim o stopim strongpela dring i no stretpela rot long go long en long wanem, dispela i mekim pipel i wokim hombru dring na dispela i agensim loa na tu, blek maket.

"Yumi i mas skulim ol yangpela bilong yumi long go hetim gut laip bilong ol na ol bai gat helt laip, dring long skel na noken abrusim mak we bai kamapim hevi, bagarap na bel nogut.

Edukesen o skulim ol pikinini i karamapim tu alkohol abius i mas stat long haus. Narapela samting em, sapos ol papa i man bilong dring, em i no gutpela piksa long ol pikinini," man i makim Laga Industris i tok.

Planti tingting tu i bin kamap long daunim mak long strong bilong strongpela dring.

Long nau, mak long strong bilong wanpela botol bia em 3.5 pesen, waitpela ken em 4.9 pesen na ais bia em 5.2 pesen.

Long wankain taim, bikpela kampani i save wokim bia long kantri em Saut Pasifik Bruri (SPB) i tok olsem wanpela koporet kampani, em i gat wok long komyuniti, sosaiti na kantri na insait long las tripela yia, em i karimaut ol edukesen awenes wok olsem dring em i laik bilong wanwan man, tasol ol i mas dring gut.

Reg Monagi i bin makim SPB long tupela de bung na tok long 49 yia we pipel long dispela kantri i wok long dringim bia na ol strongpela dring, populesen i groa bikpela na moa pipel i wok long dring tu.

Em i tok kampani i wok long strongim ol edukesen awenes long "drink responsively" o dring gut inap long mak we bai tingting bilong yu orait na yu no spak longlong na wokim nabaut.

Tu, noken draiv taim yu dring. Na sapos 4-pela lain poroman i go dring, i moabeta long wanpela i mas noken spak long long, tasol em i mass tap orait long draivim kar na kisim ol poroman i go bek

long haus.

Long askim bekim bilong wanpela man i bin stap long bung husat i bin askim long ol pikinini we krismas bilong ol i stap aninit long 18 yia i no inap yet long dring, moa yet ol skul sumatin, Mista Monagi i bin tok planti sumatin i save putim wanpela ekstra tsiot aninit long yumifom na bihain long skul, sampela i save baim bia long dring.

"Bikos ol i rausim yunifom na ol i baim bia, ol papa bilong stoa i no inap save sapos ol i sumatin o ol man nabaut", Mista Monagi i tok.

Em i tok kampani i laik helpim sosaiti long kamap ol smat, save-man na meri, helti na lain i stap amamas.

Na long mekim dispela, Mista Monagi i tok i mas gat nesanel Alkohol Abius Bot, glasim 10-pela poin bilong Wol Helt Ogenaisesen long Globol Plen bilong Alkohol Polisi, nek bilong bisnis i save mekim ol strongpela dring, glasim Lika Laisensing Loa na lukluk long ol rot bilong daunim hevi long longpela taim bikos ol dispela long sotpela taim i save mekim pipel i wokim ol samting i agensim loa.

Wantok kamap bikpela pes nau long Basamuk na Kurumbukari

James Kila i raitim

WANTOK Niuspela i kamap bikpela pes long Basamuk long Raikos distrik na Kurumbukari long Usino-Bundi distrik long Madang provins. Planti ol rurel pipel long viles na haus-lain husat long pastaim i no save ridim niuspepa na kisim ol nius bilong wanem samting i kamap long kantri na long wol nau i gat gutpela sans tru long ridim niuspepa.

Olgeta dispela developmen i kamap bihain long Ramu NiCo, divelopa bilong nikel/kobalt projek long Madang provins i bringim **Wantok Niuspepa** i go long dispela ol eria.

Koporet Afes dipatmen bilong Ramu NiCo i mekim wanpela wok bung wantaim Wantok long Mosbi long bringim pepa i go long Madang na bihain i save salim i go long KBK na Basamuk long tilim aut long ol lain husat i lenona o lain husat i stap insait long dispela projek.

Planti rurel pipel i amamas tru long ridim ol nius na save long wanem samting i kamap long gavman, bisnis na tu ol stori long wol nius na spot.



Ramu NiCo Komyuniti Afes ofisa, Nick Genaia i givim Wantok Niuspepa long ol lain long Jangang viles long Basamuk long Raikos distrik. Nick em papa bilong edita bilong edita bilong Post Courier, Frank Genaia. Foto: James Kila

Pablik 'givim tingting' forum bai kamap long Madang

James Kila i raitim

WANPELA pablik forum o miting we pablik manmeri i ken givim tingting na aidia long kamapim wanpela provinsal environmental polisi bai kamap long Madang long Mas 29 na 30.

Dispela pablik forum bai kisim tingting bilong olgeta lain stekhola o wok lain na pablik long wanem gutpela rot long kamapim wanpela stretpela lo o polisi we i stap stap long lukautim ol wok insait long bus, graun, wara na solwara insait long Madang provins.

Dispela forum o miting bai kamap insait long Divain Wod Yunivesiti (DWU) auditorium tude (Fonde, Mas 29) na tumora na bai stat long 10-kilok long moning.

Provinsal administreta bilong Madang, Ben Lange i salim aut invitesen pepa o notis long las wik i go long ol non-gavman ogenaisesen (NGO) na ol developmen patnes na tu pablik manmeri long kamap long dispela forum long givim tingting na toktok i go kam long wanem ol gutpela rot i stap long sait long kamapim lo long lukautim envairomen (bus, graun, wara na solwara) insait long Madang provins.

Madang provins long nau yet i wok long lukim planti bikpela developmen i kamap long sait long risos develop-

men. Sampela long ol dispela developmen i stap long sait long maining we, Ramu NiCo Projek long Kurumbukari na Basamuk, Yandera gol na kopa projek we Marengo i divelopim, Pasifik Marin Industrial Zon (PMIZ) projek long Widar na tu ol arapela developmen we i kamap long provins. Moa long en tu i gat arapela ol bikpela bisnis i stap long Madang provins olsem Ramu Agri-Indastri, Globe Manufacturing na RD Tuna Canning.

Mista Lange long toksave notis bilong em i askim ol developmen patnas olsem ol lain long fiseris, forestry, agrikalsa, maining na ol narapela liklik developmen projek long go stap insait long dispela bikpela miting long givim tingting na aidia bilong ol.

"Dispela givim tingting forum em bikpela samting tru long helpim Madang provins long kamap wantaim plen o polisi long lukautim na kontrol wok long sait long bus, graun, wara na solwara bilong yumi long provins," Mista Lange i tok.

Em i tok wanem gutpela tingting na aidia ol i kisim long husat ol wan wan grup o genaisen insait long komyuniti bai i gutpela long kamapim polisi pepa bilong envairomen (bus, graun, wara na solwara) bilong Madang provins.



Yut, Meri na Famili wantaim Lorraine Siraba

Siti Plening i nogat gutpela plen

OL bikipela ren i wok long kamap long Mosbi insait long las tupela wik i kamapim hevi na kros long ol lain i stap insait long Mosbi siti, bihain long sampela hap long siti i pas bikos bikipela ren na taitwara i kamapim bikipela bagarap long ol rot.

Bikos long bikipela ren na ol taitwara, planti pipel i pinis wok long apinun insait long siti i bin painim hat long kisim ol PMV bas na go long haus. Planti i bin wokabaut longpela rot i go long haus bilong ol. Dispela em bikos ol kar i lain ap longpela taim na nogat kontrol long ol Trefik Polis, ol Siti Atoriti na ol ejensi i save lukautim ol wok long dispela eria.

Taim dispela hevi i kamap, ol lain i kisim bikipela hevi tru em ol skul pikinini, ol meri, ol lapun na ol disebol lain.

Ol meri na pikinini i wokabaut long longpela rot na ol raskol i holimap sampela papa bilong kar taim ol i draiv isi long wanem, taitwara i pulapim rot na ol teksi draiva i wok long sasim samting olsem K70 long go long klostu ples tu.

Rot netwok i stap nau long Mosbi em ol i no bin gat gutpela plening pastaim na ol i wokim. Ol i no bin tingting tu long wokim narapela rot netwok pipel long siti i ken yusim taim hevi i kamap.

Em i bikipela samting long ol eben atoriti olsem taim ol i mekim ol wok plen bilong ol long ol rot, long gat 50 yia visen long wanemol hevi ol developmen bai kamapim long ol pipel na moa yet, ol meri, pikinini, ol lapun na ol disebol.

I luk olsem ol rot long Mosbi siti i no save stap gut longpela taim, tasol i save bagarap hariap. i mas gat wok painimaut long dispela.

Skelim wantaim samting i bin kamap long las wik, ol developmen i wok long kamap long siti i no tingim hevi ol meri na man inap gat long en.

Tasol bikos ol meri i save bungim laip na we long mekim ol samting insait long siti narakain, inapim ol nits bilong ol meri i save hat na tu, long promotim developmen insait long siti we man na meri wantaim i mas stap long en.

Long bildim ol siti we ol man na meri wantaim bai stap amamas long en, ol atoriti i mas gat save long jenda (man na meri), insait long ol lokol gavman institusen na ol i ken mekim ol samting bai inapim samting ol i laikim na moa yet, long ol ol meri, pikinini, ol lapun na ol disebol.

Long inapim ol nit bilong ol dispela kain pipel, ol lain i go pas long ol developmen insait long siti, ol i mas wokabaut long ol strit na luksave long ol hevi na sapos ol sevis long siti i wok.

Ol i mas putim ol askim long pipel olsem, sapos nogat bas sevis, wanem ol hevi pipel i save bungim, aipas man o meri o man long wilsia bai go long narapela sait bilong rot olsem wanem na sapos ol plen long ol rot ol i wokim nau bai seif long ol mama i gat bel na ol lapun.

Save i Ken Helpim

Resepi: MARINATED PRAWNS

Yu mas gat:
24 bikipela grinpela pron o kindam yu rausim skin, rausim ol rop na lusim tel bilong em tasol i stap.

- Marinetim:
1/3 kap anien, yu gretim
4-pela galik glav yu papaitim na i go mekmek
1/3 kap lemon juis
1/2 kap oliv oil
1-pela tebolspun oliv yu katim i go liklik
2 tebolspun frens mastad
1/2 tispun sili pauda
1/2 tispun sol
1/2 kap pasli yu katkatim i go liklik

Rot long mekim:
Putim olgeta ingridien o ol samting yu redim long kukim i go insait long wanpela kontena, miksim gut na bai marinet.

Putim ol kindam long kontena na kapsaitim marinet, tanim na karamapim marinet long tupela awa, tasol tanim i stap.

Putim ol kindam long ol skuwa o stik, o putim long grill antap long hotpela paia, tripela minit long wan wan sait.

I kuk nau, bai inap long 4-6-pela pipel i ken kaikai long en.



Raun Lukim ol Meri na Pikinini:

KISIM KOLWIN: Liklik Christol i save stap long 9-mile. Long wiken mama bilong em i kisim em i go raun long Ela Bis long kisim sampela kol win. *Wantok Niuspepa* i bungim tupela long nambis taim tupela i sindaun na lukim ol mangki i pilai long dispela nupela ples bilong ol pikinini i pilai long em we Gavana Powes Parkop i bin opim long sotpela taim i go pinis. **Poto Nicky Bernard.**

Komyuniti na polis i mas wok bung wantaim

Veronica Hatutasi i raitim

KOMYUNITI i mas wok bung wantaim long daunim ol hevi bilong alkohol abius o kisim krangi strongpela dring, Sinia Sajen Petrina Dikin em Opisa in Sas long Famili na Seksuel Vailens seksen long Nesenel Kapitel Distrik i tok.

Sinia Sajen Dikin i wok wantaim Polis Dipatmen long 30 krismas na em i save lukim na helpim planti ol meri, ol mama na ol ol pikinini na ol yangpela meri husat i kisim bagarap long ol man o ol papa bihain ol i kisim strongpela dring na ol i spak longlong, i tok.

Tasol em i tok tude, ol polis manmeri em ol man tu, na ol i save pret taim ol trabel meka i wokim toktok long ol olsem ol bai givim ol na ol famili bilong ol mekim save sapos ol i holim ol long ol trabel ol i mekim.

Olsem na em i singaut


long sapot bilong ol komyuniti long edresim ol loa na oda na bagarapim ol meri i kamap insait long ol komyuniti.

“Bai yumi stopim na daunim ol hevi olsem wanem? Mipela polis i traim long mekim wok bilong mipela, tasol pipel i save long ol rait bilong ol na olsem, ol polis i surik bek,” Sajen Dikin i tok.

Em i tok taim ol i kisim ol trabel meka i go long kot, kot i rausim keis long wanem, komyuniti i no kamaut na givim evidens o ripot long sait bilong ol.

Sajen Dikin i tokaskim sapos em i orait long ol papa i dring na ol pikinini i lukluk i stap, dringim alkohol long ol pablik ples na ol residensel eria ol famili haus slip eria.

“Yumi olgeta i mas wok bung wantaim ol polis long edresim ol dispela hevi bilong loan a oda insait long ol komyuniti bilong yumi,” Sajen Dikin i tok.



SINIA SAJEN: Petrina Dikin

Nogat luksave na ekskius long bia

Veronica Hatutasi i raitim

PASIN bilong pipel i nogat luksave long wanpela narapela, na nogat kontrol long bia na karim ol samting bilong bagarapim bodi bilong narapela man long pablik ples em sampela long ol samting we i mekim kamapim bikipela ol sosel hevi insait

long ol komyuniti na kantri. Bosmeri bilong Famili na Seksuel Vailens Komite, Ume Wainetti, i tok.

Em i tok em i tru olsem pipel i yusim alkohol olsem ekskius na samting yumi mas mekim em long skulim pipel bilong yumi long yusim gut mani, bihainim gutpela pasin na go long skul.

Bikos long planti hevi na

bagarap ol man i kamapim long ol meri bilong ol taim ol i spak, em i tok i moabeta sapos ol bisnis i save mekim ol strongpela dring i daunim mak bilong alkohol long ol wan wan botol na ken. Mis Wainetti i tok ol hevi we alkohol i kamapim i no sik, tasol ol i sosel hevi. Em i tok tude yumi lukim ol pikinini i raun nabaut long ol

strit na nogat ples bilong stap long wanem, ol papamama i lus tingting long wok bilong ol.

“Ol papamama i karim nating ol pikinini na ol i no inap long givim ol kaikia, klos, putim ol long skul na lukautim ol.

“PNG i yusim alkohol olsem ekskius, hevi long pasin na nogat luksave long wanpela narapela,” Mis Wainetti i tok.

Helpim alkohol na spakbrus hevi lain senta laikim helpim

Veronica Hatutasi i raitim

WANPELA sios beis non gavman ogenaimesen i laikim helpim long ol kampani i save mekim bia na ol strongpela dring long karimaut edukesen awenes bilong daunim ol hevi we kisim nogut strongpela dring na ol spakbrus i kamapim.

Sister Theresa bilong Louis VankekeDrag na Rihabilite-sen Senta long Waigani Katolik Sios peris insait long Nesenel Kapitel Distrik i tok senta i wok nau long 22 kris-mas we kongrikesen bilong em, Handmaids of the Lord, i go pas long em.

Sister Theresa i tok ogenaimesen bilong em i save karimaut ol edukesen awenes na kaunseling long ol setelmen, ol peris, ol komyuniti na ol skul.

“Long wok bilong mipela, mipela i painimaut olsem ol pikinini i gat 7-pela krismas i go antap i save smok, drigim hombru na kisim mariwana.

“Long skul, ol sumatin i save na wokim dispela long toilet, na tu, ol papamama i no save olsem ol pikinini bilong ol i mekim ol kain samting olsem.

“Ol dispela i kamap tu long ol skul insait long ol rurel eria long Bereina na Mekeo Dis-



HARIM: Ol lain i sindaun harim ol toktok long woksop. Foto: Nicky Bernard

trik long Sentrel provins.

“Em i isi long kisim hombru bilong wanem, ol i ken baim long liklik mani,” Sister Theresa i tok.

Em i tok hevi bilong alkohol na spakbrus em i wanpela sik we i wok long go bikpela, na tu, em i promotim HIV na AIDS. Na yumi mas kontrolim kisim bilong spakbrus, dringim alkohol na hombru na i mas stat long haus na famili pastaim bikos em ples we ol pikinini i kisim skul bilong

lainim gutpela pasin.

Em i tok ol i gat 6-pela fultaim woklain na 20-pela volantia, tasol em i hat long ol i karimaut ol wok long ol wan wan skul na ol ples long siti na ol setelmen eria bikos ol i nogat kar na ol i sot tu long mani.

“Mipela i askim komiti bilong PNGLJS na ol narapela i ranim woksop long lukluk long wok bilong ol sios na ol NGO na givim fainensel o mani sapot long karimaut ol

wok bilong ol.

“Bikpela tingting mipela i gat na i helpim pipel em mipela i wari long man na mipela i laik helpim em i di-velop long olgeta eria. Olsem na mipela i laik edresim as stret bilong ol hevi,” Sister Theresa i tok.

Man i bin sindaun na go pas long tupela de bung, Nigel Agonia, i bin tok komiti bai lukluk long tingting na askim bilong NGO bilong Sister Theresa.

Inglan-PNG Edukesen Grent no peim skul fi long Morobe.

Pasto Max Gendi Mui i raitim

PLANTI papamama na sumatin nau i luksave olsem wanpela skim we i bin promis long 2011 long helpim peim skul fi bilong ol sumatin bai i no inap peim nau.

Skim ya, England-Papua Niugini Edukesen Grent, i bin askim ol papamama long Morobe long rejista wantaim 10 pesen bilong skul fi na Grent i ken peim ful skul fi bilong ol.

Las yia 2011 i kam inap nau 2012, i nogat wanpela gutpela ansa i kam long opis bilong England-PNG Grant Scheme i stap insait long Morobe Tutumang Haus.

Tupela wokmeri bilong Morobe Provinsol Gavman em Naomi Potty na Lisa Kum i bin kamapim na ranim dispela Grent skim long Lae. Na tupela meri ya i no peim yet ol skul fi ol promis long en.

Olsem na long las wik, olgeta papamama na sumatin insait long Morobe husat i bin rejista i bin kam go bung long Tutumang Haus na tok strong long ol opisa i mas givim bek olgeta rijista mani bilong papamama. Ol lain i bin belhat na ol brukim ol windo-glas na klostu laik kukim Tutumang Haus, tasol ol polis i go na stopim.

Long las yia tupela meri i bin



GIAMAN SKIM: Ol papamama na ol sumatin i bung ausait long Tutumang Haus long las wik Fraide long save long mani bilong ol. Foto: Pasto Max Gende Mui

kisim samting olsem K 90, 000 mani i kam long ol sumatin na papamama olsem 10 pesen dis-posit mani bilong ol..

Nau yet Morobe provinsol gavman i tok em i no save long dispela Inglan-PNG Edukesen Grent Skim, maski em operet insait long Tutumang Haus.

Deputi Gavana bilong Morobe, Morokoi Gaiwata, i tok mekim tok klia olsem Morobe

provinsol gavman i no save o em i nogat koneksen long dispela Edukesen grant skim.

Tasol em i wari olsem em i bagarapim nem bilong provin-sol gavman.

Wankain taim yet, opis bilong Britis Hai Komisn long PNG (Mosbi) i tok em i no save long dispela Inglan-PNG Edukesin Grent Skim.

Tasol ol opisa bilong dispela skim i tokaut long ol papa-

mama na sumatin olsem dispela skim bai givim bek rejista mani long papamama long dispela wik. Dispela i bilong givim taim long benk i ken stretim

K 89,000 sek bilong ol pas-taim. Nau ye, yanpela papa na tisa long Lae,

Yatu Idauman bilong Im-manuel Lutheran Skul, i tokim Wantok olsem planti ol sumatin bilong skul tu i bin rejista, tasol ol i no kisim helpim yet.

OL PRINSIPOL BILONG
GUTPELA LIDASIP
wantaim Evangelist
OHARE JABERE



God i makim lida long helpim manmeri bilong em

INSAIT long lidasip, wanpela samting i stap ples klia i olsem God i save makim wanwan lida long kamapim sampela kain wok long helpim ol manmeri i go inap long mak we God i laikim.

Taim dispela wok i pinis, em wok bilong yu na li-dasip bilong yu tu i pinis.

Sapos yu abrusim mak na stap longpela taim long wanpela lidasip posisen bai wok bilong yu i no inap kamap gut; olgeta intres tu igat long yu bai i kam inap long mak bilong em na i pinis olsem.

Kain olsem; yumi lukim long histori long Baibel long laip bilong sampela lida olsem Moses. Moses God i makim em long mekim wanpela wok tasol, dispela wok em long bringim ol manmeri i kam aut long Isip long han bilong king Fero igo long graun we ol i ken kaikai gut, malolo gut na lotu long God wanpela tasol.

Moses i bringim ol manmeri i kamaut long Isip na bringim ol i kam kamap long maunten Nipo na em i pinis. God i givim em blesing long mekim dispela wok tasol, na ino bilong igo moa.

Bikpela wok bilong Moses em long wok wantaim God long bringim ol lain long ples we nau ol i stap i go long nupela hap. Lida i gat dispela kain wok.

Wok bilong kisim ol long ples we nau ol i stap i go insait long nupela hap. Mining bilong dispela kain tok, em i bikpela moa insait long olgeta kain level bilong lidasip.

Yu mas kisim ol manmeri i ples we nau ol istap long bodi, sol, o tingting na spirit igo insait long nupela level o ples we ol i painim nupela kain sindaun na amamas.

Long bodi, em i tok long kisim sindaun na hevi bilong ol gutpela sevis olsem, mani na wok bisnis,

Helt sevis olsem haus sik na ol edpos, rot na trenspot, na gutpela skul na edukesen em ol sampela samting we yumi manmeri i gat nid long en. Gutpela haus, gutpela kaikai, gutpela wara na gutpela lait. Long tingting, em tok long manmeri i mas senis long kain tingting nogut we i save bagarapim laip na sindaun bilong ol. Nau i go long nupela kain senis na tingting we ol i painim gutpela bel isi, malolo na bel gut.

Gutpela tingting i kamapim gutpela toktok we i kamapim gutpela pasin na gutpela sindaun. Rom 12:2, Baibel itok long yumi mas kisim nupela tingting.

Taim manmeri i kisim klia tingting long em yet na long ol arapela bai toktok na pasin bilong em tu i senis.

Toksave: Narapela hap bilong em bai kamap long neks wik.



WELKAM LONG PNG: Intanesenel pasto spika, Dokta Myles Munroe, na meri bilong em, Ruth, i kam kamap long PNG long las wik. Kingal Ministris i bin stretim na sapotim wokabout bilong tupela i kam long PNG. Eria we Dokta Myles i givim bikpela lukluk long en em long kamapim ol gutpela kwaliti lida long PNG i luksave long Bikpela. Long stap bilong em long Mosbi, em bin bungim Praim Minista Peter O'Neill na ol bisnis lida. Em i gat plen long statim lidasip trening institute long PNG. Foto: Nicky Bernard



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

PNG Gavman bai noken statim yet nupela judisal loa

PAPUA Niugini gavman bai noken statim yet dispela nupela loa em planti pipel i no amamas long en.

Pipel em ol i sutim tok long dispela Judisal Kondak Bile m palamen i bin oraitim, i no long taim i go pinis, bai givim moa pawa long gavman winim pawa bilong judisari.

Praim Minista Peter O'Neill i tok dispela loa i orait, tasol em i askim Konstitusenal Lo Rifom Komisen long skelim tingting bilong pablik long en.

Tasol Siaman bilong Komisen, na gavman memba Gabriel Kapris, i mekim sampela toktok em i soim olsem, dispela wok bai i no bilong skelim tumas tingting bilong pipel, tasol em i bilong edukesen pipel long dispela loa.

"Taim komisen i go aut long givim sans long pablik long lukim bikpela bilong dispela amenmen, ol bai luk-save watpo gavman i strong long oraitim dispela bil," em i tok.

Mista Kapris i tok bai ol i noken yusim pastaim dispela nupela loa inap long ripot bilong Komisen i go long Palamen bihain long 9-pela mun.

Long wik i go pinis, sampela tausien yunivesiti sumatin long Pot Mosbi i bin protes agensim dispela loa, na ol i askim gavman long rausim.

Tonga pipel i tok gutbai long King George Tupou V

OL sevis bung bilong planim bodi bilong leit King, George Tupou V long matmat i wok long kamap long Nuku'alofa.

Ol i ting funeral sevis bai kisim sampela awa na bai bungim 1 tausien pipel olgeta long karim kofin, ol viles pipel na sumatin.

Planti pipel i sanap long rot long soim rispek na lukim kofin i ron lusim ol.

Dispela prosesen i bin stat long Pales long belo, na pinis long ples matmat bilong Royal famili.

King i bin dai long wanpela haus sik long Hong Kong 9-pela de i go pinis. Em i bin gat 63 krismas.

Long ples balus long Mande, ol i bin holim wanpela welkam seremoni long kisim kofin bilong en.

Planti handret pipel i bin sanap long rot stat long Fua'Amotu epot, i go



KAM BEK:

Bodi bilong King bilong Tonga, George Tupou V i kam bek long Tonga.

long taun, taim sata balus bilong Saina i kamap long ples balus wantaim bodi bilong King.

Australia Gavana Jeneral, Quentin Bryce bai stap hap bilong planti ol arapela foren lida long funeral sevis. King George i bin wok long kisim marasin long kensa na taip-2 daiabitis o sik suga.

Long 2006, em i bin lusim planti 'monaki pawa', na i bin lidim senis long kamapim namba wan demokretik ileksen.

King tu i bin i gat ol narakain stail, olsem werim ol yunifom oltaim, na draiva i save draivim em raun long kantri bilong en, insait long wanpela London teksi keb.

PNG papagraun tok lukaut long Esso

OL papagraun long LNG eria bilong Hailans i tok lukaut olsem bikpela trabel bai kamap agensim LNPG kampani, Esso Highlands.

Bipo memba bilong Komo-Margarima, Alfred Kaiabe, i mekim

dispela toktok bihain long ol papagraun i bin stopim ol wok long LNG long Hides-4.

Ol papagraun i mekim olsem bikos LNG ges divelopa, Esso Highlands na gavman i no harim askim bilong ol long kompensesen.

Ol dispela papagraun i tok ol bai no inap larim LNG projek long go het sapos ol i no stretim ol dispela askim bilong ol.

Vanuatu i no wanbel wantaim ol foren bisnis

VANUATU i givim woning long ol foren bisnis lain long noken kisim ol bisnis bilong ol lokol pipel.

LAIN bilong Vanuatu Invesmen Promosens Atoriti i tok ol foren bisnis kampani husat i save go insait long ol bisnis em ol lokol pipel tasol i mas mekim, bai kisim ol gutpela mekim-save sapos ol i brukim dispela loa.

Toktok bilong ol i kamap bihain long ol i bin painim tripela foren bisnis kampani i ronim ol Kava bisnis long kantri long ol dispela wik i go pinis.

Kava bisnis em i wanpela wok em gavman i makim bai ol asples Vanuatu tasol i ken mekim.

Vanuatu Invesmen Promosens Atoriti i tok ol foren bisnis kampani i ken mekim ol bikpela bisnis em ol lokol pipel i no inap mekim.

Mama loa bilong PNG i antap long Palamen: Sir Michael Somare

SIR Michael Somare i bin bekim dispela ol toktok long we Gavman bilong Papua Niugini i wok long yusim strong bilong en long daunim wok bilong ol jas.

Dispela i bin kamap long las wik taim ol i tok orait long Judisal Kondak Bil. Tok orait bilong bil, em i no kisim planti 'dibet' o tok pait long Palamen i bungim pinis planti tok kros raun long kantri.

Long Fraide, ol sumatin bilong Yunivesiti bilong PNG i bin holim wanpela mas i go long Opis bilong

Praim Minista O'Neill na givim petisen o askim pepa bilong ol long soim laik na belkros bilong ol.

Sir Michael i sutim tok long gavman bilong O'Neill long em i brukim bikpela loa bilong kantri.

Pasifik Midia Miting i go het long Fiji

KAPITEL bilong Fiji i wok long bungim ol niuslain insait long Rijen long miting long ol Pasifik Midia.

Pasifik Ailans Nius Asosiesen (PINA), i go pas long hostim dispela miting em i wok long kamap nau long Pacific Harbour.

Dispela i namba tu Pasifik Midia Samit PINA i holim.

Tingting bilong PINA i holim miting long Fiji i bin bungim planti toktok kros bikos long ol strongpela loa bilong Fiji Interim gavman.

Interim Praim Minista Frank Bainimarama i givim bikpela tok welkam long miting long Tunde.


I gat bikpela lain niusmanmeri bilong ol Melanesia kantri i kamap pinis.

Pacific BEAT

4. 5. 6am & 4pm. 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Ol kempen projek kamap nau

INSAIT long Mosbi siti, ol wokman wok long putim kolta long ol rot na stretim ol rot i go we planti lain i tok dispela kain sevis inap kamap long las yia na ol krismas i go pinis.

Bilong wanem na nau tasol long taim bilong nesenel ileksen?

Wankain tu, yumi harim long nius olsem Prais Minista Peter O'Neill i karim mani go peim ol papagraun bilong Sauten Hailans, na tu, em raun givim moa long K1 milien long stretim ol rot na skul na arapela wok insait long ilektoret bilong em.

Yumi harim tu ol memba wok long putim mani go long mekim ol wok na stretim ol samting insait long ol distrik long provins nau.

Bikpela askim em olsem wanem na yupela no laik mekim olsem long tupela o tripela krismas go pinis? Bilong wanem na nau tasol klostu long taim bilong nesenel ileksen?

Em wankain askim bai planti manmeri bai askim tu. Olsem na yumi skelim go bek long tupela na tripela krismas go pinis sapos yumi



save lukim ol kain helpim na wok kamap insait long ilektoret bilong yumi o nogat. Nogut ol memba i lokim mani i stap long mekim las minit projek bilong winim sapot na vot bilong yumi long taim bilong nesenel ileksen.

Olgeta yia wanwan memba i save kisim planti milien kina mani bilong distrik long mekim wok.

Olsem na i nogat wanpela gutpela as sapos ol memba i no mekim samting inap nau tasol long taim bilong ileksen na ol laik mekim samting. Em narakain stail na pasin olgeta.

Nau em taim bilong elek-sen na bai yumi lukim kainkain wok na mani bai ron ples klia bikos em taim bilong pulim ai bilong ol manmeri long kisim sapot na wanbel bilong ol.

Ol kendidet wantaim mani tu i wok long mekim wankain. Ol i wok long tro-

moi mani long helpim ol wok bilong sios, spot na ol arapela helpim long komyuniti. Bikpela as tingting em bilong winim wanbel bilong yumi ol manmeri.

Dispela em sampela bikpela as yumi no save kisim gutpela sevis na helpim long distrik bikos ol memba lokim mani stap bilong givim aut long taim bilong ileksen wantaim ol giaman liklik gris projek nabaut.

Yumi noken pundaun long dispela bikos em mani bilong yumi ol pipel stret tasol memba i no salim kam hariap long mekim wok bilong yumi. Olsem na noken seksek na paitim han long memba taim em kam sanapim wanpela projek bilong skul, haus sik, rot, bris, wok didiman, komyuniti bisnis na ol arapela moa. Ol dispela samting em memba inap mekim long namba wan taim yet taim em go insait long haus palamen.

Yumi salim ol memba go long palamen long kisim mani na salim kam long ples long mekim wok. Bilong wanem na ol lokim

stap?

Plantu taim ol memba save kam long ples na tok bai em givim dispela kain mani long helpim na sanapim kain wok o projek olsem long helpim komyuniti. Em i no givim mani yet na em tok tasol long maus. Tingim, mani em ol kisim pinis na wanpela yia olsem na insait long dispela yia, wok mas kamap. I noken aburimis go tupela tripela krismas bihain.

Em taim bilong ileksen nau na yumi mas tingting gut taim ol memba na kendidet i kam na mekim ol kainkain gris toktok long yumi. Makim wanpela o tupela bikpela projek yu laikim na tokim ol stret olsem yu laikim dispela projek mas kamap insait long dispela yia taim em kisim mani bilong distrik long dispela yia stret. Em mani bilong yumi na yumi gat rait long tokim ol long kisim kam na mekim wok bilong stretim ples na bringim sevis na developmen long hap bilong yumi.

Noken westim taim, tokim ol stret taim ol kam kempen long hap bilong yu.



KOMENTRI

Vot em i pawa bilong yumi wanwan, i no bilong kaikai fri samting

YUMI Papua Niugini i no longlong moa.

Taim yumi no kisim mobail fon yet, yumi save raitim pas o ring long pablik telepon. Maski lain long yusim pablik fon i save longpela tru, yumi save sanap bihainim. Bikos i no bin gat narapela rot.

Taim yumi kisim mobail fon long kantri, laip bilong yumi senis. Tingting bilong yumi op, na nau, ol liklik bebi i save pinis long presim baten na ring long mobail.

Ol kain kain nupela masin bilong ol waitman i kam na opim tingting bilong yumi. Tasol wanpela samting yumi holim strong yet, em i pasin bilong luksave long bikman bikos em i gat mani na em i gat kainkain naispela samting.

Yumi save lukim ol bikman, na yumi save ting olsem ol i mas kisim moa rispek na luksave, winim mipela ol man nating.

Long taim bilong ileksen kempen, bai ol iau bilong yumi bai pulap long kain kain ol swit loli toktok. Bai yumi lukim pes bilong Somare i pundaun long han bilong kain kain manmeri.

Ileksen kempen taim, em planti manmeri long kantri i save lukim olsem taim bilong kisim fri mani na kaikai.

Watpo na yumi wok bihainim dispela kain pasin yet?

Nau em i taim bilong senisim pasin, senisim tingting, na skelim gut ol man i sanap na traime winim vot bilong yu.

Pasin bilong lida, em i pasin bilong bungim inap sapot long ol bikpela lain manmeri i bilip long ol tingting na bilip bilong em yet.

Tasol sapos em i bilip tasol long giaman na stilim mani bilong pablik, bai yumi tok em i lida man tru, na yumi mas votim em bikos em bai givim fri mani na kaikai long yumi.

Nogat tru!

Mani ol memba i wok yusim nau long karimaut ol bikpela projek long winim bek bilip bilong komyuniti, em i no mani bilong ol. Em i mani bilong pipel.

Noken aipas.

Nau em i taim bilong yumi yusim pawa bilong yumi wanwan long votim ol trupela lida na manmeri. Dispela wanpela pawa, manimak bilong em i no arere long fri kaikai, bia na mani. Manimak bilong em i winim olgeta samting bilong grian.

Pawa bilong em i sanap strong long trupela bel, trupela tingting, na gutpela pasin. Em i rait bilong yumi wanwan.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Neville Choi

Published at Portion 445, Kanage Street, Six Mile NCD

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Obama raun sekim haus-gat long Korea

PRESIDEN bilong Amerika, Barack Obama, i lukluk long spai glas i go long Not Korea long Obsavesen Pos o haus gat long Ouellette long taim em i raun i go long Join Sekyuriti Eria bilong Dimilitari Zon (DMZ) klostu long Panmunjom long boda namel long Not na Saut Korea long Mas 25, 2012. Mista Obama i bin kamap long Seoul long sindaun long 2012 Seoul Nuklia Sekyuriti Samit i kamap pinis long Mas 26-27.



Pop Benedict 16 i kisim sombrero hat olsem presen long Meksiko

POP Benedict 16 i kamap long Baisentenial Pak long Silao, Meksiko, we em i makim bikpela misa long Mas 25. Insait long namba tu raun bilong em i go long Meksiko, Pop Benedict 16 i raun lukluk long Meksiko, pastaim long ol i raun i go long Kuba.



Gillard i bungim presiden bilong Saut Korea

PRESIDEN bilong Saut Korea, Lee Myung-Bak, i mitim Praim Minista bilong Australia Julia Gillard, taim em i kamap long welkam seremoni bilong 2012 Seoul Nuklia Sekyuriti Samit long Seoul long Mas 26, 2012.



Ol sipsip wasman protes long Frans

OL SIPSIP i ron pasim ol rot long Brignoles, wanpela sauten Frans taim wanpela protes i kamap we ol wasman bilong ol sipsip i autim belkros long kamapim bek bilong ol wulf dok long Mas 26, 2012.



WOK REDI LONG ILEKSEN 2012



SEKIM NEM:

WANPELA lapun man bilong Sabama, long NCD i sekim sapos nem bilong em i stap long koman rol. Dispela tupela wok manmeri bilong PNG Ilektoral Komisn long Sabama i sindaun wetim ol manmeri long hap long sekim sapos nem bilong ol i stap long rol bilong vot long mun Julai. Ol wok manmeri bilong Ilektoral Komisn i go raun long tupela wik go pinis long kisim nem bilong ol manmeri husat nem bilong ol i no stap long koman rol. Dispela wok i kamap nau long olgeta hap long kantri. *Poto Nicky Bernard*

INSAIT:

**PES 18
YU SAVE LONG OL
SISTEM BILONG
VOT?**

**PES 22
TRAWEN: ILEKSEN
2012 BAI GO HET**

**PES 23
TIPNG: ILEKSEN
2012 MAS GO HET**



WOK REDI LONG ILEKSEN 2012



Eleksen Manaja bilong Isten Hailans Provins Alwyn Jimmy. Em i winim wanpela awod bilong gutpela wok bilong em.

'Isten Hailans redi long ileksen'

Sape Metta i raitim

SIKPELA wik i stap nau bipo long jeneral ileksen bai kamap, na Isten Hailans ileksen Menesa, Alwyn Jimmy i tok

Ilektoral opis long provins i redi long karimaut wok long dispela 2012 ileksen.

Em i tok ois bilong em i stenbai tasol long go na mekim ileksen taim ileksen i kamap long mun Jun.

Mista Jimmy i tok ol wok-

manmeri long provinsal ilektoral opis i wok hat na pinisim ol komon rol apdet, maski sapos ol i no kisim pe long karimaut dispela wok.

Em i tok ol distrik long provins we i pinisim komon rol wok stretim bilong ol, em

Daulo, Lufa, Unggai-Bena, Kainantu na Goroka.

Mista Jimmy i tok insait long 266 wod long Isten Hailans, ol ilektoral opis woka i pinisim komon rol long 144 wod, na narapela 122 wod bai pinis klostu

nau.

Em i tok Obura-Wonenara distrik tasol i bin hat long pinisim hariap bikos i nogat mani long baim helikopta na balus long flaim ol wokman i go long bus ples.

Mista Jimmy i tok wok bilong strongim na stretim komon rol long Lamari na Yelia i pinis, na balus na helikopta bai pikim ol wokman wantaim ol komon rol long Marawaka na Menyama.



WOK REDI LONG ILEKSEN 2012

Australia halivim PNGEC redi long ileksen 2012

Aja Alex Potabe i raitim

AUSTRALIA bai givim moa halivim long PNG Ilektoral Komisina (PNGEC) long karimaut wok ap-det bilong komon rol, na larim jeneral ileksen i bihainim plen na kamap long mun Epril na pinis long mun Julai stret.

Taim Deputi Praim Minista, Belden Namah, NCD Gavana, Powes Parkop na planti moa long ol memba i laik surukim dispela ileksen, Praim Minista, Peter O'Neill i les long surukim ileksen 2012, tasol em i laik lukim kantri i go insait long ileksen long Epril

27 taim ol rit pepa bai kamaut.

Long sapotim tingting bilong O'Neill, Australia i givim 88-pela kompyuta long larim PNGEC i hari-apim ol wok bilong ap-detim data o ripot bilong ol ilektoral rol.

Australia bai givim tu wangepela bikpela save man bilong Australia Ilektoral Komisina long halivim PNGEC mekim stretpela ilektoral rol ap-det. Antap long dispela, Australia bai givim tu 4-pela save man bilong kompyuta long larim ilektoral rol i 'klin' na rausim ol 'giaman nem' o nem we i stap planti taim long rol.

Na Australia bai givim tu

3-pela gavman save man long wok aninit long PNGEC olsem Deputi Operesens Dairekta, Ea Transpot Kodineta, na Lojistiks Edvaisa. Ol dispela wokman bai kam insait long kantri bihain long tupela wik, na ol bai wok arere wantaim ol wok manmeri bilong PNGEC yet.

Hai Komisina bilong Australia, Ian Kemish i tok, Australia em i gutpela poroman bilong PNG, na em i laik larim PNGEC stap long gutpela mak long ronim jeneral ileksen long Jun dispela yia.

"Australia bai no nap tokim PNG long go long ileksen. Mi olsem poroman

bilong PNG i laik lukim PNG i go insait long ileksen bikos em i save kamap olgeta 5-pela yia.

"Mipela i bin halivim PNGEC wantaim K26 milian long ronim gut ol ileksen. Ol ileksen i kam long 2012 i bin gutpela tru wantaim halivim bilong Australia na mi gat bilip olsem dispela ileksen bai go gut tru," Kemish i tok.

Sif Ilektoral Komisina, Andrew Trawen i tok tenkyu long Kemish i makim maus bilong gavman na pipel bilong Australia long halivim PNG karimaut gutpela ileksen.

"Dispela sapot mipela i kisim em bikpela tru. Em i soim gutpela poroman yumi

tupela kantri i gat. Na tu Australia i bekim singaut bilong Praim Minista Peter O'Neill, husat i bin go visitim Praim Minista billong Australia, Julia Gillard Kenbera long luksave long PNG na givim sampela halivim long ileksen taim," Trawen i tok.

Wankain taim, Trawen i tok olgeta bikpela wok manmeri bilong PNGEC long menesmen level i save wok hat na wok gut tru, tasol gavman i no bin hariap long givim mani long mekim wok. Olsem na ol i isi isi liklik long pinisim ol wok bilong ap-detim komon rol.

Trawen i singaut strong long ol manmeri long noken

mekim ol nogut toktok long PNGEC bihain long em i laik lukim wangepela giaman ripot olsem Australia i laikim gavman long rausim sampela bikpela wok manmeri bilong Komisina.

AusAID na Australia Hai Komisina i tok dispela ripot em i giaman ripot bikos ol i les long surukim ileksen na ol i wok long halivim PNGEC long olgeta samting komisina i nidin long en.

Trawen i singaut strong long pablik long pasim maus bilong ol bikos PNGEC i wok long mekim gutpela samting long ronim gut dispela ileksen, na tu ol i no save long dispela ripot, we ol narapela niuspepa i toktok long en.



Elektrol Komisina Andrew Trawen i soim Australia Hai Komisina Ian Kemish long data bilong komanrol olsem olgeta samting i redi long 2012 ileksen. Poto Nicky Bernard



WOK REDI LONG ILEKSEN 2012

Yu save long ol sistem bilong vot?

PLANTI manmeri i no save wari tumas long Nesenel Jeneral Ileksen bilong kantri, tasol yu ting olsem ileksen i ken senisim laip bilong ol dispela lain, na yu yet tu, o nogat?

Yes. Sapos yu wanela sitisen bilong dispela kantri, ol ileksen bai senisim laip na sindaun bilong yu tu.

Disisen yu mekim long taim bilong ileksen, em i bikpela samting.

Ol vot bilong yu em i bikpela samting, bikos ol i halivim long makim husat bai lukautim kantri long narapela faivpela yia i kam.

Taim yu vot, yu halivim long makim wanem kain developmen bai kamap long eria bilong yu, na tu, long ol arapela hap long kantri.

Stap sanap insait long wok ileksen em i bikpela wok politiks bilong olgeta manmeri i ken vot. Em sapos krismas bilong yu i 18 o moa.

Noken ting olsem politiks, o vot bilong yu, o stap bilong yu insait long ileksen em i samting nating. Bikos em i bikpela samting tru!

Vot bilong yu i ken senisim laip na sindaun bilong yu, ol pikinini bilong yu, na ol arapela long komyuniti bilong yu long narapela faivpela yia i kam.

Insait long ol ileksen yumi karimaut long Papua Niugini, yumi yusim tupela kain we bilong vot.


Namba wan Sistem bilong Vot

'FIRST PAST THE POST'
Insait long 'first past the post' sistem bilong vot, wanem kendidet husat i kisim moa vot long olgeta arapela kendidet, i ken win, maski long luksave bilong ol vot. Insait long dispela sistem, ol kendidet husat i kisim 6% tasol long ol vot i ken win na go long palamen.

Namba tu Sistem bilong Vot

Insait long 'opsonel preferensal sistem o Limitet Preferensal Voting (LPV) sistem', kendidet i win i mas pulim moa long hap long olgeta vot. Long dispela rot, em i kamap memba wantaim vot i kam long bikpela namba manmeri husat i tro-moi vot.

Sampela lida na saveman i ting olsem 'opsonel preferensal vot sistem' em i demokretik o fri moa long 'first past the post' sistem, bikos kendidet husat planti moa manmeri i laikim, i save winim ileksen.



I kam long 2012 Nesenel Ileksen Buklet bilong Caritas PNG

Elektrol Komisina Andrew Trawen i traim nupela ballot bokis we ol bai yusim long dispela ileksen. Dispela ballot bokis em strong nay u ken lukim ol pepa ples klia. Poto Nicky Bernard



WOK REDI LONG ILEKSEN 2012

Save long wok bilong ol Politikal Pati

KONSTITUSEN o mama loa bilong Papua Niugini i oraitim kain kain politikal pati long gat nem na mekim wok.

Planti ol memba bilong palamen i sanap bihainim wanwan politikal pati long laik bilong ol.

Ol politikal pati em ol bikpela samting long taim bilong ileksen.

Planti kendidet i wok long sanap long ileksen wantaim sapot bilong ol politikal pati.

Pati save halivim ol long ol politikal kempen bilong ol.

Ol politikal pati yusim ol symbol o piksa pes, ol flek, posta, na beds long traim pulim ol manmeri long votim ol kendidet bilong ol.

Wanpela politikal pati em i

grup manmeri husat i gat wankain aidia o tingting long we kantri i mas wok o ron. Wanwan manmeri long kantri i ken joinim wanpela politikal pati ol yet i laik joinim.

Ol memba bilong pati i wanbel long ol loa na regulesen i stiaim grup bilong ol.

Sampela ol bikpela wok

bilong politikal pati, em:

- plenim ol polisi bilong pati;
- makim ol nupela pati kendidet bilong ileksen;
- sapotim ol kendidet ol i makim long taim bilong ileksen;
- traim long pulim na tanim tingting bilong gavman, olsem, long oraitim ol projek pati i givim;

● givim mani long halivim wok bilong pati i go het;

● mekim plen na mekim samting long strongim pati i go insait long gavman, bihainim ileksen rot, o long wanpela 'Vot i nogat bilip'. **Wok bilong kisim pati i go insait long gavman, em i Namba wan wok!**

Wanem politikal pati i bikpela namba kendidet bilong ol i win insait long Nesenel Jeneral Ilekse em i namba wan provinsal gavman. Sampela taim, sampela ol pat ii save bung long kamapim wanpela kolisen wantaim laik bilong apim namba bilong ol kendidet bilong ol long fomim gavman.



Politikol Pati save pulim sapota.

Planti long ol politikol pati save gat sapota bilong ol, ol dispela lain em ol sapota bilong wanpela nupela pati ol lonsim, ol kam wantaim kaikai long amamasim nupela pati bilong ol. *Poto Nicky Bernard*



WOK REDI LONG ILEKSEN 2012





WOK REDI LONG ILEKSEN 2012

Trawen: Ileksen 2012 bai go het

Aja Alex Potabe i raitim

ILEKSEN 2012 bai go het bikos gavman bai brukim Mama Loa o Konstitusen sapos ol i tingting long surukim dispela ileksen, Ilektoral Komisina (PNGEC) i tok.

Sif Ilektoral Komisina, Andrew Trawen i tok, pawa bilong ronim ol ileksen long kantri i stap long Ilektoal Komisina (PNGEC) na nogat wanpela man i nap long stopim ron bilong dispela

ileksen bikos em bai brukim loa.

“Olgeta det long ronim ileksen i stap long Mama Loa. Olsem na sapos gavman i tingting long surukim dispela ileksen, em bai brukim Seksen 105 (1) (a) bilong Maa Loa na ol i mas senisim Ogenik Loa bilong Nesenel na Lokol-level Gavman Ileksen,” Trawen i tok.

Seksen 105 (1) (a) i tok: “jeneral ileksen mas kamap insait long 3-pela mun bihain long dispela de we kisim bek

bilong ol rit pepa bilong pastaim ileksen bai kamap na makim 5-pela yia stret.”

Trawen i tok Gavana-Jeneral, Se Michael Ogio, i givim tok orait pinis long PNGEC long ronim dispela ileksen long taim stret, na PNGEC bai tokim em long givimaut ol rit pepa long Epril 27 long larim ileksen kamap long Jun 23.

“Em wok bilong mi long sekim gut Mama Loa long larim ol ileksen i ron gut long taim bilong en stret. Disisen bilong stopim o surukim ilek-

sen mas i kam long PNGEC tasol. Nogat, PNG bai no inap long bilip long wok bilong PNGEC,” Trawen i tok.

Em i tok long 2002, Morauta gavman i bin kisim PNGEC i go long kot long surukim ileksen tasol PNGEC i bin bihainim Mama Loa na karimaut ileksen long taim stret.

“Wok bilong mekim plen, redim ol samting, na ronim ileksen olgeta 5-pela yia em i wok bilong PNGEC aninit long Mama Loa na mipela i

gat bilip long pinisim stretim bilong olgeta Komon Roll na kamapim stretpela ileksen long Jun.

“Palamen i pret nogut dispela ileksen i bagarap tasol mi gat bikpela bilip long ol wok bilong Komisina. Ol wokman bilong Komisina i save long wok bilong ol yet gut. Olsem na yumi olgeta i mas wokbung na saptim PNGEC long kamapim fri, fea na seif ileksen,” Trawen i tok.

Em i tok ol i nau kam arere long pinisim stretim bilong ol

Komon Roll na ol bai pinisim dispela wok long April 27.

Trawen i tok em i gutpela long kamapim nupela baio-metrik sistem bilong ronim ileksen, tasol PNGEC i mas traim dispela pastaim na sapos em i wok gut, em i mas yusim long ronim dispela ileksen.

PNGEC i amamas long yusim dispela sistem tasol em bai westim taim gen long testim na sapos em i go karangi, PNGEC bai westim mani gen, na dispela i ken bagarapim ileksen.



Elektrol Komisina Andrew Trawen



WOK REDI LONG ILEKSEN 2012

TIPNG: Ileksen 2012 mas go het

Aja Alex Potabe i raitim

ILEKSEN 2012 mas bihainim taim bilong en yet stret aninit long Mama Loa, na mas go het bikos nogat wanpela Mema bilong Palamen i gat rait long surukim ileksen, Trensparensi Intenesenel PNG (TIPNG) i tok.

TIPNG i kamautim dispela namba wan tingting bihain long Palamen Spika Jeffrey Nape, Deputi Praim Minista,

Bleden Namah, NCD Gavana Powes Parkop, na sampela Mema bilong Palamen i bin strongim sait long surukim dispela ileksen i go moa inap 6 o 12 mun bihain.

Taim Nape gat strongpela bilip olsem ol memba i gat pawa long stopim, surukim o larim ileksen go het, Namah na Parkop i strong long surukim ileksen bikos tupela i bilip planti pasin korapsen olsem vot tupela o planti

taim, stilim balot bokis na pepa, na paul pasin bai kamap, na dispela bai no nap kamapim trupela na stretpela pasin demokrasi long makim ol lida i go insait long palamen.

Maski kantri nogat gutpela sistem olsem baio-metrik sistem long ronim ileksen long stretpela we, TIPNG i tok gavman na palamen bai ples kliia brukim Mama Loa bikos Seksen 105 (1) (a) i tok: "jeneral ileksen mas

kamap insait long 3-pela mun bihain long dispela de we kisim bek bilong ol rit pepa bilong pastaim ileksen bai kamap na makim 5-pela yia stret."

Siaman bilong TIPNG, Lawrence Stephens, i tok; "Olgeta det long ronim ileksen i stap long Mama Loa. Olsem na sapos gavman i tingting long surukim dispela ileksen, em bai brukim Seksen 105 (1) (a) bilong Mama Loa na Ogenik Loa

bilong Nesenel na Lokol-level Gavman Ileksen."

"Em i ples kliia, ol memba i nogat rait long holim pawa moa long 5-pela yia. Spika tu em wok long kisim rong edvais o toktok long daunim pawa bilong Ilektral Komisina.

"Em i wok bilong Ilektral Komisina long edvaisim o tokim Gavana-Jeneral long givim tok orait long ronim ileksen.

"Inap long paulim tingting

bilong ol pipel. Kantri mas go long ileksen bikos taim bilong yupela em i pinis nau.

"Yupela i ken go askim sapot bilong ol pipel long kambek long Palamen na makim maus bilong ol olsem lida.

"Noken giamanim ol pipel bikos palamen i nogat pawa long surukim ileksen na planti pipel na oganisenen i sapotim ilektral komisin long larim ileksen go het," Stephens i tok.

Tupela yangpela marit wantaim twin bebi bilong tupela i sekim nem bilong tupela long Tokara taim ol tim bilong elektrol rol go raun long hap. Poto Nicky Bernard



Wetim long kisim Nem

Ol wok manmeri bilong elektrol komisin sidaun long weim ol manmeri husat i laik vot long 2012 long kam sekim nem bilong ol long komanrol. Ol Elektrol Komisin wok manmeri bin go aut long wanwan hap long ol manmeri mas kam sekim nem bilong ol. Sapos yu laik vot long dispela ileksen yu go sekim nem bilong yu long Elektrol opis klostu long yu. Poto Nicky Bernard



WOK REDI LONG ILEKSEN 2012



long en. Tasol sait bilong em yet long vot, em i tok em i paul bikos em i nogat nem long Ilektoral Rol. Olsem na em i tok em i no redi yet long dispela ileksen, na em i laikim gavman mas surukim dispela ileksen.

Victor Nape em i wokman bilong PNG Micro Finance Ltd na em i save stap long Hohola Bens Pik. Em i ting dispela ileksen bai no nap go gut bikos planti ol man, husat bai sanap long ileksen bai yusim mani long mekim braiberi na konim ol manmeri long votim ol. Victor i les long gavman i surukim dispela ileksen bikos ol bai brukim Mama Loa sapos ol i surukim. Em i tok ol manmeri bai kirap nogut long lukim mani na ol bai nonap votim gut ol gutpela lida man, husat bai makim maus bilong ol na karim sevis i go daun long pipel. Tasol em yet em i les long kisim beriberi mani, na em i tingting long skulim ol poroman na famili lain bilong en long stopim pasin bilong kisim braiberi mani na votim man. Em tok em i redi long vot long Mosbi Not Wes bikos nem bilong en stap pinis long Ilektoral Rol.



Billy Wabila em i sumatin bilong Yunivesiti bilong Papua Niugini (UPNG). Em i tok em i les long gavman i surukim dispela ileksen bikos ol pipel i laik makim nupela lida na ol i redi stap. Em i tok sampela lida i no bin mekim wanpela gutpela samting insait long dispela 5 yia na nau em i taim bilong ol dispela kain lida long go ausait long palamen. Em i ting sampela hap long kantri ileksen bai go gut tasol sampela hap olsem long hailans, planti ol man bai kisim bagarap na pait i ken kamap bikos ileksen i no save kamap gut long hailans, maski PNG em i wanpela strongpela demokretik kantri. Em yet i redi long votim wanpela gutpela lida husat bai putim PNG na liklik manmeri bilong dispela kantri i go pas. Em les long votim ol man husat i save kon planti na stilim pablik mani na mekim bisnis bilong ol yet, taim pipel i safa na bagarap stap. Em i laikim dispela ileksen mas go het long taim stret, na gavman noken surukim. Em i sekim nem bilong en na em bai vot long UPNG Waigani kempas.



Charlie Jiwaka em i wanpela draiva na mekenik bilong Curtain Bros PNG Ltd. Em i tok em i amamas long O'Neill-Namah gavman bikos ol i mekim planti gutpela samting long kirapim dispela kantri. Em i tok em i gat ol liklik brata susa husat i stap long skul, na dispela fri edukesen polisi bilong O'Neill-Namah gavman em i gutpela tru long sait bilong en. Olsem en em i sapotim pati bilong Peter O'Neill, Peoples' National Congress (PNC) Pati na PNG Party bilong Belden Namah. Em i tok em bai votim wanpela man dispela tupela pati i makim



Wesley Spinder em i wokman bilong Red

Cross PNG. Em i tok dispela nupela gavman bilong Peter O'Neill em i gutpela gavman tru, na em i gat strongpela bilip olsem O'Neill bai kisim pawa gen bihain long ileksen 2012. Em yet i sapotim PNC Pati bilong O'Neill na em bai tokim olgeta famili lain bilong en long votim O'Neill. Em i tok gavman noken surukim dispela ileksen bikos, insait long liklik taim tasol dispela gavman i mekim planti gutpela samting, na sapos ol i surukim ileksen em bai bagarapim gutpela nem bilong O'Neill-Namah gavman. Em i tok dispela gavman i wok long mekim sampela nogut samting tu, nogut sapot bilong en i wes nating so em i laikim ileksen long go het tasol. Wesley i les stret long kisim braiberi mani na sapos yu wanpela kendidet laik braibim em o famili bilong en, em i tok em bai tokaut na kotim dispela man husat laik mekim braiberi. Em i tok em i redi long vot bikos nem bilong em i stap pinis long komon rol long Fergusson Ailan long Milen Bay Provins.



Maria Wangale em i save salim buai, smuk na kol wara long Renbo Maket, Mosbi. Em tok em bai nonap vot nating. Sapos wanpela kendidet i givim mani long em, orait em bai votim dispela man. Em i tok ol lida i no save mekim wanpela gutpela samting, tasol ol i save mekim bisnis bilong ol yet na kamap milina wansait. Olsem na wanpela vot bilong en i gat pawa long mekim wanpela man i win. Em i les long westim nating tasol em i laik salim dispela wanpela vot bilong en long wanpela man husat i laik baim vot. Em laikim dispela ileksen mas go het na gavman noken stopim bikos em i no bin lukim gavman i stopim ol ileksen bipo. Tasol em i no save sapos nem bilong en i stap long Ilektoral Rol o nogat. Olsem na em i no redi long vot long dispela ileksen.



Obert Bare em i sumatin bilong Muaina Sekendari Skul long Simbu Provins. Tasol nau em i pinisim skul na em i kam stap long Mosbi. Em i tok long lukluk bilong en, em i lukim na harim planti manmeri stret i laik votim ol man husat i kam aninit long PNC Pati bilong Peter O'Neill. Em yet tu bai votim wanpela man husat i sanap long ileksen aninit long pati bilong O'Neill o Belden Namah. Tasol em i tok em i no sapotim dispela toktok bilong sampela memba bilong palamen long surukim ileksen. Em i tok ol pipel i lukim tru tru sevis na han bilong gavman bilong O'Neill na ol i redi long votim O'Neill na ol man em i makim long en long kisim narapela gavman na ronim kantri. Tasol em i tok em i laikim ol arapela pasin bilong dispela gavman long senisim ol loa long mekim ol stap yet lon pawa. Obert i ting ileksen bai gut tru bikos bihain long dispela bikipela politikel hevi namel long Gren Sif Somare na O'Neill, kantri i no bin go bagarap, na wankain samting bai kamap long dispela ileksen. Em yet i redi long vot long Mosbi Not Is bikos nem bilong en stap pinis Ilektoral Rol.



Chris Yoba em i pinisim gret 12 bilong en na em i stap tasol long Mosbi. Em i save salim buai long 6 mail maket na em i pilim olsem planti pasin braiberi bai kamap long dispela ileksen. Em i tok em i harem pinis sampela tok win i kam long sam-

pela bikman olsem sampela memba na ol man husat bai sanap long ileksen i tingting long yusim mani lon baim vot. Em i tok em bai kisim braiberi mani bikos nogat kot long dispela. Tasol em i laik makim wanpela gutpela lida stret na em i les long gavman i surukim dispela ileksen. Em i tok gavman bilong O'Neill em i gutpela gavman tasol praim minista em yet noken bihainim tingting bilong ol arapela memba olsem Belden Namah long surukim dispela ileksen. Chris i redi long vot bihain long nem bilong en i stap pinis long Ilektoral Rol.



Cynthia Asinga em i wanpela wok meri bilong ProLink Intenesenel long Waigani Vision City. Em tok em i laik makim nupela lida bikos PNG bai gat moa mani i kam long planti maining na petrolium projek olsem PNG LNG Projek. Sapos ol nogut lida i go insait long palamen, ol i ken stilim mani i kam long ol dispela projek na manmeri bai stap turangu yet. Em i les long gavman surukim dispela ileksen bikos taim bilong ol long stap lida insait long 5 yia em i pinis nau. Sapos ol i laik stap lida, orait ol i mas kisim tok orait biong ol pipel long dispela ileksen. Em i tok memba bilong en, Dame Carol Kidu, bai lusim politikis dispela yia, na em i laik makim nupela gutpela lida husat bai senisim laip bilong planti manmeri long Mosbi siti. Cynthia i redi long vot long dispela ileksen bikos em lukim pinis nem bilong en i stap long Ilektoral Rol bilong Mosbi Saut.



Bonnie Francis em i

wanpela hai skul tisa long Kwikila Sekendari Skul long Sentral Provins. Em i ting em i gutpela tru long gavman i yusim dispela niupela Baio-metrik sistem bilong votim ol lida. Tasol em leit pinis long yumi yusim dispela nupela sistem bikos yumi no testim yet, na sapos em go karangi, bai yumi asua gen na painim narapela hevi gen. Olsem na yumi mas skulim ol manmeri long makim gutpela lida na stopim ol pasin korapsen long ileksen taim. Em i les long gavman i surukim dispela ileksen bikos gavman bai brukim loa na kantri i ken bagarap sapos dispela i kamap. Em salensim ol arapela manmeri husat i ken rit na rait long skulim ol arapela ples manmeri long makim gutpela lida na stopim pasin bilong kisim mani na vot. Em i tok Iletoral Komisnin mas mekim moa awenes na skulim moa manmeri long makim gutpela lida. Em yet i no redi long vot bikos em i no lukim nem bilong en long Ilektoral Rol.



Richard Bay em i wanpela sigi mangi bilong Wap & Co Security Sevis. Em lukim olsem kantri i redi long go insait long ileksen na manmeri i les long gavman surukim dispela ileksen. Tasol em i tingting planti bikos ol polis na ami i bin bruk long taim politikel asua bilong Somare na O'Neill, na nogut ol polisman na ami i mekim sampela paul pilai. Em i gat bilip olsem planti manmeri i save long loa na save wanem samting em i gutpela na nogut. Ol wanwan tasol i no save. Em i askim PNGEC long larim ol ami na polis i mekim wok bilong ol gut long ileksen taim. Em i tok em yet i redi long vot bikos nem bilong en i stap pinis long Iletoral Rol aninit Morata namba 1, Mosbi Not Wes.



WOK REDI LONG ILEKSEN 2012

Ombudsman Komisen mekim gutpela wok awenes long Isten Hailans

Sape Metta i raitim

WANPELA tim bilong Ombudsmen Komisen long Pot Mosbi i kamap long Goroka na mekim wok awenes long Goroka yet, na sampela hap long Isten Hailans long skulim ol manmeri long tingting gut, glasim na skelim na tromoi vot long taim bilong bikpela nesanel ileksen we bai kamap long mun Jun dispela yia.

Ombudsmen John Nero, husat i go pas long dispela tim, i toktok long Lokol NBC Isten Hailans Tok Bek So

olsem dispela ileksen em i wanpela ileksen we em i bikpela stret long PNG, bikos long taim ileksen i kamap, bai yumi wokim gut ol samting, o sapos nogat, bai yumi ken brukim na bagarapim olgeta samting.

"Long dispela as, mipela long opis bilong Obudsmen i mas kamaut na kamapim proektiv awenes long skulim yupela ol manmeri na vota, bipo long yupela i go long ileksen na votim ol gutpela Lida we bai ol i ken bringim gutpela sevis i go bek long yupela," Mista Nero i tok.

Em i tok namba wan

samting ol manmeri o vota i mas mekim nau, em long lukluk na skelim gut na makim ol gutpela Lida we ol i noken pret na tu feivarim ol (Fear or Favor) na husat bai ken sanap strong na makim ol long palamen.

Mista Nero i tok, ol pipel na ol vota i makim ol Lida husat i mas i gat sikspela gutpela astinging em;

1. Quality (Kwolati) – Ol Lida i mas gat gutpela save long olgeta levul long sevim pipel.

2. Integrity (Intekriti) – Ol pipel bai ken trastim ol lida long bringim ol guds na

providim gutpela sevis i go bek long ol.

3. Accountability (Akauntabiliti) – ol lida i mas gat gutpela tingting long wokim ol disisen long how bai ol i ken yusim gut ol fan na givim akaun i go bek long gutpela pasin.

4. Transparency (Transparensi) – ol lida i mas wok long ples kliia na ol manmeri i mas luksave long wok bilong ol.

5. Servitude (Wok sevis) – ol Lida i mas tingim na providim sevis i go pas-taim long ol pipel bipo long ol yet; na

6. Fairness (Wankain luksave) – ol llekted lida i mas givim fea sevis long olgeta manmeri, maskim long wantok sistem. Olgeta lain i mas kisim wankain sevis maski sapos ol votim ol o nogat.

Em i tok em taim nau long ol vota i mas lukluk gut na skelim ol lida pastaim bipo long ol i tromoi vot bilong ol long makim na givim pawa long ol Lida.

Sapos ol lida i nogat dispela sikspela astinging na ol i gat planti lem fleps katen, katen bia na braiberi mani, maski, westim vot

long dispela kain ol lida. Yumi mas senisim pasin na tromoi vot long stretpela pasin na makim stret ol gutpela lida.

Ombudsmen tim insait long wan wik program blong ol long Isten Hailans, i wokim proektiv awenes long Goroka University (UOG), Goroka Teknikal Koles, Goroka Sekenderi Skul, Asaroka Sekenderi Skul, Henganofi Sekenderi Skul, Uggai/Bena distrik Edministresen Senta na Obura/ Wonenara na Kainantu distrik LLG bung long Kainantu.



Sepik Haiwe, stap nogut yet

Bustin Anzu i raitim

SEPIK Haiwe em wanpela bikpela haiwe i joinim Is Sepik na Wes Sepik o Sandaun provins. Dispela haiwe i save ron long nambis na bihain kalap i go insait long maunten, veli, bikbus na bihain ron igo daun gen long nambis.

Em inap long kamap wanpela bikpela na namba wan haiwe i ken joinim tupela Sepik provins. Na i ken painim sampela rot long go bungim Madang na bihain joinim Hailans bilong Papua Niugini. Na dispela inap soim olsem rot i joinim olgeta bik taun na ples bilong Papua Niugini.

Tasol dispela i no luk olsem.

Politiks, bisnis, jeles na birua, em sampela ol samting we mekim na dispela rot i no moa stap long gutpela sait bilong ol i yusim.

Tasol ol pipel nidim sevis bilong Gavman.

Maski, rot i nogut na bagarap olgeta, ol mas painim sampela kain rot bilong yusim ol dispela rot.

Ol turangu lain. I no hevi bilong ol tasol ol kism pen bilong sampela lain.

Dispela haiwe bilong Sepik em wanpela haiwe i joinim olgeta long boda bilong Indonesia long Wutung na kam. Dispela em wanpela trupela intanesinol haiwe sapos ol lidaman na meri i lukautim gut na putim mani long stretim dispela rot.

I no long taim igo pinis, Gavman bilong Gren Sif Se Michael Somare i bin putim sampela milien long stretim dispela rot. Tasol i kam inap nau, mipela i no save long dispela mani igo stap long we na husat i kism long mekim wanem.

Tingim dispela rot taim yu ron long Wewak i go long Vanimo. Yu bai ron bihainim

nambis, bihainim nambis na ol lain gorgor na brukim sampela wara. Kalap i go antap long maunten, na bihain skruim i go long veli na kamap long sampela ples tais na kamap long ol ples i stap insait long bus.

Bihain, brukim ol bikpela bus na tais, kamap long ples i nogat manmeri i stap long en.

Sampela taim long dispela ron, yu ken sanap na kism ol gutpela win bilong bus na harim ol kra i na singaut bilong ol samting long bik bus olsem pisin na snek.

Bihain kamap long sampela klinpela wara i no nogat deti long en. Na yu ken lukim sampela ol bris i bruk namel long taim bilong bikpela ren na brukim ol dispela bris.

Ol dispela i luk olsem sampela yia i go pinis na nogat luksave bilong wokim o kamapim nupela bris gen.

Bihain yu kamap long wanpela gutpela rot we das i kirap na yu stap pinis long Vanimo, bikples bilong Sandaun provins na boda bilong Indonesia.

Planti hap long sait bilong Wewak, olsem long nambis, planti hap rot em ol i putim kolta pinis na ol wara tasol em ol painim hat long wokim ol bris.

Taim long kamap klostu long Aitape, rot i bagarap nogut tru na i luk olsem ol kar i gat fo-wil tasol i ken ron long ol dispela hap ples. Ol dispela kain kar olsem 10-sita na len krusa i ken brukim wara na ron long ol dispela kain rot.

Taim abrusim Aitape na laik kamap long Wara Laimbrum, we save kamapim boda bilong Aitape, rot i nogut tru. Ol traipela potol insait long namel bilong rot stret. Na hat long ol fo-wil tu i go.

Sampela kain wara tu save ron. Yu ken lukim planti ol klinpela na tu, sampela i braun na deti nogut tru.

Ol dispela wara em ino gat bris long en. Planti bilong ol bris em taim wara i tait, rausim i go. Na i nogat tupela. Olsem na planti ol bikpela wara em ol mas brukim long olgeta dei bilong ron.

Taim i gat ol bikpela ren long ol maunten, ol wara i save tait nogut tru. Na ol kar mas sanap arere long rot igo inap ol i lukim wara i go daun nau em ol i save brukim na igo long narapela sait.

Ol manmeri bilong Is Sepik em ol lain bilong wokim maket stret. Long nupela Wewak, bai yu lukim kaikai i kapsait na save sting. Ol pis bilong wara na kafing bilong Sepik i save pulumapim tru maket.

Ol basket bilong Sepik, ol buai bilong ol insait long ol lip kokonas basket na ol Sepik basket we save i gat disain bilong en i pulap long dispela hap.

Aitape, wanpela bikpela distrik bilong Sandaun i wanpela gutpela ples stret.

Em i sanap arere long nambis na i gat gutpela wof bilong ol bikpela kago sip i ken igo insait na sua tu.

I gat stori olsem long taim bilong Wol Woa II, ol woa sip i sua long hap.

Na ples balus bilong Aitape tu em wanpela strongpela ples balus. Maski em i ren na wara i pulap, ol balus i save pundaun long wanem, dispela ples balus i gat rel (rail) aninit we ol i bin yusim long taim bilong woa i stap yet na em i ken holim ol balus long taim ples i wet.

Tasol, maket bilong Vanimo i narakain. Bai yu inap painim ol kain kain kaikai olsem. Maket em bai drai long ol dispela samting na sapos, wanpela man o meri i kism ol kain kain kaikai bilong ples i go salim, em i dia tumas.

Planti ol samting bilong Vanimo maket em bai yu lukim ol samting we ol i

kism long Batas na salim. Planti bilong ol dispela kaikai na samting em prais i go daun tasol ol ino strong tumas.

Ol bisket em swit moa yet na ino gutpela long ol pikinini i kaikai.

Ais blok em wanpela bikpela maket bilong Vanimo. Ples i stap arere long nambis na save hot olgeta taim na manmeri i stap long hap em ol save painim wara tumas na ais blok em wanpela bikpela bisnis bilong ol manmeri.

Rot bilong Wes Kos bilong Vanimo yet, em long Vanimo igo long Wutung em namba wan stret. Rot i bihainim nambis bilong Vanimo na ples i luk nais moa yet na kolta igo olgeta long boda bilong Papua Niugini na

Wes Papua bilong Indonesia.

Sapos yu Tingim gut tru long bipo, taim bilong ol waitman i kam inap nau, bai yu lukim olsem planti ol gutpela man bilong Sepik i holim ol gutpela wok. Na wanpela bilong ol dispela em Se Michael, namba wan Praim Minista bilong Papua Niugini.

Sapos em i Tingim Sepik pastaim, planti ol gutpela samting bai inap stap long Sepik. Sepik Haiwe em wanpela bilong ol.

Tasol em i tingim Papua Niugini olsem wanpela kantri pastaim long asples bilong em yet Sepik. Olsem na planti samting, Sepik i kam bihain yet.

Long wanpela gutpela moning o gutpela san na ples i klia olgeta na yu sanap antap long Wewak Boys Town, we i stap antap long maunten, bai yu lukluk i kam daun long Wewak na bai yu lukim olsem em i stap gut tru arere long nambis.

Na yu ken lukim Sepik Haiwe i bihainim sait bilong nambis long wes kos igo long Aitape na Vanimo.



Aitape Distrik Opis

Sampela wok developmen long Aitape distrik olsem dispela distrik opis bilong ol. **Poto: Bustin Anzu**




Bikpela pot hol

Ol rot namel long Aitape na bikpela wara Laimbrum em dispela kain, bai yu bungim planti pot hol namel. Ol krusa tu i kism het pen long rot tu. **Poto: Bustin Anzu**



Bris i bruk

Dispela bris i bruk longpela taim liklik na ol i no senisim. Ol kar i save brukim wara long gutpela taim na taim em i ren, ol mas wet pastaim. **Poto: Bustin Anzu**



Gutpela ples long weskos

Gutpela nambis bilong Wes Kos olsem i mekim Sepik em wanpela naispela ples. **Poto: Bustin Anzu**



Kar i pas long wara

Long taim nogut, yu ken bungim dispela kain birua. **Poto: Bustin Anzu**



Helpim i stap

Kain helpim ken kamap long sapos yu pas long rot. **Poto: Bustin Anzu**



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Privu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Privu
7.05PM Musik na Chit Chat

Raun wantaim Wantok kru ...

Liklik pilai ples pulim planti pikinini na kastoma bilong Stop N Shop

Nicky Bernard i raitim

PLANTI ol pikinini long sait long Gerehu, Renbo na Yuni nau gat ples bilong amamasim ol yet na wetim papamama go mekim baim kaikai long stoa.

Dispela ples bilong pilai bilong

pikinini em Stop N Shop stoa i mekim bilong ol, dispela liklik pilai ples save pulap long olgeta avinun na wiken.

Planti papamama i amamas long Stop N Shop Renbo long kamap dispela liklik pilai ples, long wanem bai isi long ol yet bai ken

insait long stoa na baim kaikai.

Dispela pilai ples i gat ples bilong wel kam daun, rop bilong traim strong bilong ol pikinini long go antap, rot olsem sinek na sampela long ol namba pilai.

Planti long ol famili save kisim ol pikinini bilong ol go pilai long

wiken long pasim taim bilong ol tasol na amamasim ol pikinini bilong ol.

Dispela bikpela stoa tu nau i kisim moa kastoma long wanem ol pikinini save askim ol long go raun long dispela long pilai long dispela liklik pilai ples.



YUMIFM 93.5FM National Weekly Hit Parade: Produced & Host by: Kasty. Table with columns: Week Before, Last Week, This Week, Charting Song, Artist.

EMTV Television Guide

FONDE 29 MAS, 2012

5.00 AM G JOYCE MEYER. TODAY
5.30 AM G TODAY
8.30 AM BROADCAST
12.00 AM EMTV
12.30 PM AUSTRALIAN NETWORK

9.30 PM G ELITE MUSIC ZONE
10.30 PM G NATIONAL EMTV NEWS REPLAY
11.30 PM - Australia Network -

FRAIDE 30 MAS, 2012

5.00 AM G JOYCE MEYER. TODAY
5.30 AM G TODAY
9.00 PM CLASSROOM BROADCASTS
12.00 PM EMTV
1.00 PM AUSTRALIAN NETWORK

11.30 PM - Australia Network -
NEWS REPLAY
SARERE 31 MAS, 2012

6.59 AM STATION OPEN
7.00 PM ULTIMATE GUINNESS WORLD RECORDS
8.00 AM G NAMASTE YOGA: Innovative series combining stunning photography and original music

THE SEEKER: A CAPTIVATING ACTION-ADVENTURE TV SERIES - In a mystical land, Richard Cypher discovers his true destiny as he, a mysterious young woman, a wise old wizard and a magical sword take on the evil DarkhanRahl.

DESPERATE HOUSE WIVES: SOCCER REPLAY
11:30 PM NATIONAL EMTVNEWS REPLAY
12:00 PM - Australia Network -

SANDE 1 EPRIL, 2012

6.29 AM STATION OPEN
6.30 AM G IT IS WRITTEN
It Is Written is an international, Christian television ministry dedicated to sharing insights from God's word with people around the

7.00 AM G HILLSONG
Join Pastor Brian Houston every Sunday morning as he teaches to changes mindsets and empower people to lead and impact every sphere of life.
7:30 AM G CHIT CHAT with Sir Paulias Matane Tune in every Sunday Morning and be inspired by Sir Paulias as he delivers inspirational stories, including guest interviews.

8:00 AM G NAMASTE YOGA:
8:30 AM G BLISSFUL BLOSSOM
8:15 AM G AUSTRALIAN NETWORK
10:00 AM G RESOURCE PNG (REPEAT)
11:00 AM G AUSTRALIAN NETWORK
1.00PM ONE DAY CRICKET -

Raun wantaim Kanage olgeta wik



Famili i no amamas long mani bilong mi



Dia Laipain,
 Mi wanpela marit man, i gat 40 krismas na mi gat 6-pela pikinini. Nambawan i stap long yunivesiti na lasbon i wokim Gret 7. Mipela i wanpela Kristen famili. Mi gat gutpela wok long wanpela kampani na long planti taim long ol wikde nait, mi save wok leit. Wankain tu long ol wiken. Antap long planti wok mi gat, mi wanpela sios lida na tupela taim insait long wanpela wik, mi save stap long sios.
 Meri bilong mi i gat luksave na em i no save komplem na em i save lukautim ol wok long haus na famili. Tasol ol pikinini i stat komplem long mama bilong ol olsem mi no wanpela gutpela papa bikos mi no save sindaun long haus na mi no laikim ol. Mi laikim ol na mi save baim ol samting ol i laikim na mi givim ol mani taim ol i askim. Tasol watpo ol i komplem? Wanem samting i rong long ol?
CONFUSED FATHER

Dia Pren,
 Mipela i luksave long ol wari bilong yu na mipela i amamas long yu painim mipela long kisim helpim long watpo ol pikinini bilong yu i no amamas long samting yu mekim olsem yu glasim long em.
 Long pas bilong yu, yu tok yu gat gutpela wok, yu save wok leit na yu save gat wok long sios tupela taim insait long wanpela wik. Yu bilip olsem yu gat gutpela marit laip bikos meri bilong yu i no save komplem na tu, yu save baim ol kaikai na ol narapela samting long famili bilong yu. Taim ol i askim long mani samting yu save givim ol. Tasol nau ol pikinini i komplem long mama olsem yu no save stap long haus na yu no laikim ol.
 Pren, mipela i laik bai yu malolo pastaim na tingim komplem long ol pikinini bilong yu. I gat sampela as long komple bilong ol long yu? Sapos yu wok long baim ol kaikai samting bilong haus, watpo na ol i pilim olsem yu no lukautim ol gut na yu no laikim ol? I gat sampela narapela samting ol i no kisim? Mani inap long baim laik pasin na stap wantaim? Pren, mani i no inap long baim trupela laik pasin na stap wantaim. Wanem samting em i mekim em long sotpela taim tasol. Na sapos yu pinis long wok o ol i rausim yu, wanem samting bai kamap? Bai yu givim yet ol samting yu bilip yu mekim gut taim yu nogat mani?
 Famili em i yunit na em i tingting bilong God we olgeta plen na as tingting bilong

em i stat. Olgeta famili memba i gat wok long ranim famili. Moa yet, papamama i mas mekim wok long lukautim ol pikinini na inapim ol nits bilong ol. Ol nits em ol dispela- Fisikel (mani, kaikai, klos, haus), "Emotional"-Gutpela pasin, stiatok, gutpela lukaut long gutpela taim na taim nogut), Spirituel-Skulim ol long laik pasin bilong God na kisim ol i go long lotu.
 Olsem mipela i tok pinis, ol papamama na ol gadien o was papamama i mas inapim ol pikinini long ol dispela samting. Ating yu ting olsem yu givim ol pikinini mani samting inap wok yu mekim na ol narapela samting em ol yet bai painim. Pren tingting gut long dispela samting i kamap long yu. Sapos yu ting olsem God bai inapim ol eria we yu no mekim, wanem wok bilong yu long ol pikinini bilong yu?
 Planti papamama i bisi long wok na ol sios wok wantaim na ol i no tingim ol famili na wok biong ol olsem papamama. Ol i lusim wok long ol hauslain na ol patna long lukautim ol pikinini bilong ol. I no ol narapela o patna i bin karim pikinini bilong yu. Yu tok olsem meri bilong yu i no save komplem na olsem, marit bilong yu i gutpela.
 Tingting gut gen. Ating tingting bilong em lwankain olsem ol pikinini tasol em i no laik tokim yu bikos long wok bilong yu na sios wok yu gat long em.
 God i putim yu olsem papa na man bilong haus. Sapos yu lukluk gut, meri bilong yu i mekim wok olsem papa na mama taim yu bisi long wok na sios. Mipela i laik tokim yu olsem long painim taim long stap wantaim meri bilong yu na kisim tingting bilong yu long dispela. Ating hevi i no ol pikinini bilong yu i komplem, tasol yu olsem papa bilong ol.
 Bihain yu toktok wantaim meri bilong yu, yu singautim wanpela famili miting na noken haitim, tasol tokim ol stret olsem yu feil long i, no mekim wok bilong yu olsem papa na stap klostu long ol taim ol i laikim yu. Mipela i save olsem bai em i hat. Na noken mekim bikos mipela i givim

yu tingting long mekim. Mekim bikos yu luksave olsem yu no tingim ol pikinini bilong yu long ol narapela eria bilong laip. Kamapim gut laip na pasin bilong tok sori na lusim ol rong pasin i save kamap taim yumi tokaut long ol rong bilong yumi. God i no save lusim tingting ol toktok bilong em olsem i stap long John 1:9. Em bai stretim laik pasin na stap bilong yu wantaim meri na ol pikinini bilong yu. Moa yet, God bai luksave lon g sevis bilong yu i go long sios na stretim sindaun bilong wantaim famili bilong yu.
 Yumi lukim trupela toktok long buk Baibel long Psalm 127: 1-5. Tru tru God i wokim haus bilong yu? Sapos ol pikinini bilong yu i komplem, i mas sampela samting yu no wokim stret i stap. Ol pikinini i blesing bilong God long yumi. Yu wok long lukautim gut ol pikinini bilong yu i putim yu olsem waspapa bilon g ol long presen bilong em? Tru, yu ken tok olsem God i bildim ol samting tasol yu feil long mekim hap wok bilong yu long bildim o wok long lukautim ol pikinini na meri bilong yu long olgeta eria bilong laip. Long sait bilong mani, yes tasol olsem wanem long ol narapela eria we yumi toktok long ol?
 Yumi olgeta i save mekim mistek tasol larim God i helpim yu long stretim sindaun insait long famili long sait bilong strongim laik pasin, tras, stretpela pasin na luksave na yu ken bihainim ol dispela long laip na stap bilong yu.
 Pren, i gutpela sapos yu na meri bilong yu i ken go lukim Pasto bilong yu long kisim moa helpim na stiatok. Laipain tu i stap long helpim yu. Yu ken ringim mipela long 3260011/3263138 o kam lukim mipela long senta klostu long Waigani maket.
 God i ken stap wantaim yu na givim yu stia long laip na wok bilong yu
Pren bilong yu, Laipain

**Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.
 Laipain**

- NEM:** Ludwick Monduk
KRISMAS: 25 (man)
ADRES: C/- Clerance Kombukun, PO Box 302, Kimbe, West New Britain Provins
SAVE LAIKIM: Rit, mekim pani, wok, pilai, harim musik, lukim TV na mekim poroman.
- NEM:** Monita Raio
KRISMAS: 22 (meri)
ADRES: Lae Ever Green, PO Box 167, Lae Morobe Provins
SAVE LAIKIM: Go Lotu, RitimBaibel, pilai gita, singsing, mekim poroman, pilai ol bol gem, wok long gaden, wasim ol klos na raitim pas.
- NEM:** Womie Ben- Efore
KRISMAS: 26 (man)
ADRES: C/- Christ For The Nations, PO Box 1332, Lae, Morobe Provins PNG
SAVE LAIKIM: Lainim tok ples, senisim presen, harim musik, gaden na painim wanpela poromeri long stap wantaim oltaim.
- NEM:** Aweqwii de Paps
KRISMAS: 24
ADRES: K- Toro Hire Cars, PO Box 111, Vanimo, Sandaun Provins
SAVE LAIKIM: Go Lotu, ritim ol buk o niuspepa na mekim pren.
- NEM:** Gitfty Ocloo
KRISMAS: 34 (meri)
ADRES: PO Box 35, Agona Nyakrom, Ghana - Phn: 0023354787139
SAVE LAIKIM: Raitim pas, painim wanpela man long maritim na stap wantaim oltaim.
- NEM:** Shirley Hori
KRISMAS: 18 (meri)
ADRES: Marinumbo Primary School, PO Box 352, Wewak, East Sepik Provins
SAVE LAIKIM: Harimm, danis, kuk, wasim klos, pilai spots, Go Lotu, mekim pani na go swimming
- NEM:** Sharon Tatapai
KRISMAS: 15 (meri)
ADRES: Yaraka Memorial School, PO Box 532, Kavieng, New Ireland Provins
SAVE LAIKIM: Go Lotu, lukluk CD na pilai spots.
- NEM:** Nasain Calvin
KRISMAS: 14 (meri)
ADRES: Yaraka Memorial School, PO Box 532, Kavieng, New Ireland Provins
SAVE LAIKIM: Pilai Spots, Go Lotu, Lukim CD na rit planti
- NEM:** Karl Pewa
KRISMAS: 30 (man)
ADRES: Semoroks Gospel Club, PO Box 3368, Lae, Morobe Provins.
SAVE LAIKIM: Stap wantaim Jisas, Pilaim gospel musik na laikim kristen Lutheran meri o arapela sios meri husat igat strongpela tingting long pilaim musik bilong God.
- NEM:** Darren Calvin
KRISMAS: 15 (man)
ADRES: Yaraka Memorial School, PO Box 532, Kavieng, New Ireland Provins
SAVE LAIKIM: Lukim CD/Pilai Spots na Ridim buk

Moa intres long NDB Stret Pasin Stoa projek

James Kila i raitim

DISPELA dinau bisnis program we Nesanel Developmen Benk (NDB) i laik kirapim gen ol i kolim "Stret Pasin Stoa Skim (SPSS)" long 2012 i kirapim bel bilong moa long 4,000 pipel long PNG na planti long ol dispela lain em ol marit man wantaim ol meri bilong ol husat i ronim bisnis.

Dispela SPSS i bin kamap long 1970s we i lukim planti ol lokal bisnis lain long kantri i kisim dinau long beng long kirapim ol tred stua bisnis long ol taun na distrik long PNG na i bin ron gut tru long sevim ol manmeri long pablik insait long kantri.

Menesing Dairekta bilong NDB, Richard Maru plen na tingting bilong NDB long bringim bek SPSS i kirapim bel bilong planti ol lokal pipel

tru insait long kantri.

Mista Maru i tokaut long dispela i no long taim i go pinis long Madang taim em i bungim ol stekholdas long provins long tokaut long plen bilong NDB long dispela yia.

Em i tok tu olsem ol pipel i wok long salim yet ol leta long soim intares (EOI), maski olsem taim bilong passim ol EOI i pinis.

Mista Maru i tokaut olsem em i guria stret long lukim olsem sampela ol bikipela wokman meri husat i holim ol top o antap posisen na lain i gat digri long wok bilong ol i raitim leta na askim long join SPSS na laik ronim bisnis bilong ol yet.

Em i tok NDB i mekim wanpela sabmisen i go long gavman pinis long givim sid capital o mani long kirapim bisnis we NDB bai i yusim long statim skim na kamapim gen Risev Ektiviti Lis Rejistre-

sen long ol manmeri bilong PNG stret long kisim bek na ronim ol tred stua na ol haus kaikai na ol narapela bisnis we ol PNG yet i ken mekim, tasol nau i stap long hap bilong ol outsait lain olsem ol Esian.

Mista Maru i mekim bikipela tok tenkyu i go long Minista bilong Tred na Industri, Charles Abel long tingting bilong minister long bringim bek lo bi-

long Risev Ektiviti Lejislesen, we bai i stopim ol outsait lain long stap papa o ronim ol tred stua bisnis na haus kaikai bisnis long PNG.

Bisnisan long Madang na foma MP bilong Madang, Stanley Pil, husat i kirapim bisnis bilong em wantaim SPSS i tok planti lain long PNG i gat gutpela save long ronim bisnis na bisnis i ken kamap gut na stap longpela taim.

Tasol, Mista Pil i tokaut strong olsem NDB i was gut tru skrinim ol skelim ol lain husat i aplai bikos sampela bilong ol em ol "pepa bisnis man" tasol na ol i ken kisim mani na ronawe.

Mista Pil i tok pastaim long NDB i givim dinau o lon i go long husat lain i aplai, ol wokman i mas go na sekim stret olsem em tru olsem ples we bisnis i laik kamap i stap.

Sapos nogat orait ol mas rausim aplikesen bilong husat man o meri ya i aplai.

NDB i luksave olsem em bai kos samting olsem K100 milien long ronim dispela SSPP wantaim 1,000 lain i aplai na ol dispela lain husat aplikesen bilong i kisim tok-orait pinis bai kisim 100 pesen sapot o helpim i kam long NDB long statim na ronim bisnis bilong ol.

Papa Lealea papagraun kisim K17.5 milian IDG

PRAIM Minista Peter O'Neill i givim K17 milian sek bilong Infrastraksa Developmen Gren (IDG) long ol papagraun bilong Papa Lealea las wik Fonde..

Ol papagraun bilong 4-pela eria insait long Papa na Lealea, we ol bai putim LNG rifaineri bilong tanim ges i go bek long wara na salim i go aut long Saina, Japan na Taiwan, i kisim K17.472 milian long gavman.

"Dispela gavman em i gavman bilong ol liklik pipel olsem yupela. Olsem na mipela i harim singaut bilong yupela na i kam givim dispela mani long ples bilong yupela stret long soim mipela i no lus tingting long yupela," O'Neill i tok.

Em i tok ol arapela papagraun i no save yusim dispela kain mani gut, na salensim ol pipel long soim gutpela pasin bilong yusim mani long ol arapela papagraun.

"Yusim dispela mani gut long mekim wok stret. IDG em i no mani bilong kaikai nating nating, tasol em bilong stretim ol rot, bris, skul, na haus sik. Mekim gutpela wok wantaim dispela mani," O'Neill i tok.

O'Neill bai giuvim tu narapela K10 milian long stretim Papa na Lealea rot.

Long nait, O'Neill i bin lon-sim "Operesen Open Hat" long Club Motukea ausait long Mosbi, we em i bin givim K200, 000 long statim fan resing.



IDG MANI...Prait Minista Peter O'Neill i givim IDG sek long Sentral Gavana, Alphonse Moroi, long Papa Lealea. Foto: PM's Media Unit



UNESCO EKSEKETIV BOD MITING, 2012
SESEN NAMBA 189 LONG UNESCO -
PARIS, FRANS.
27 FEBRUARI I GO INAP 9 MAS, 2012,
STETMEN I KAM LONG HONORABEL THEODORE
ZURENUOC, MP, PASIFIK MAUSMAN LONG
UNESCO EKSEKETIV BOD.

MADAM SIAMERI
DAIREKTA JENERAL
OL BIK-MAUSMANMERI
OL MANMERI

MI BRINGIM GUTPELA TOK AMAMAS I KAM LONG GAVMAN NA 6.5 MILIAN PIPEL BILONG PAPIA NIUGINI, NA TU, PASIFIK RIJEN. TRU TUMAS, EM I WANPELA ONA NA BIKPELA LUKSAVE LONG MI LONG GIVIM MINISTERIAL STETMEN MAKIM MAUS BILONG MINISTA BILONG MI NA PASIFIK MAUSMAN OL I MAKIM, HONORABEL THEODORE ZURENUOC, MEMBA BILONG PALAMEN NA NESENEL MINISTA BILONG EDUKESAN BIKOS EM I NO INAP STAP WANTAIM OL WANMINISTA NA WAN BOD MEMBA LONG DISPELA EKSEKETIV BOD MITING BIKOS EM I SINDAUN LONG KIBUNG BILONG PALAMEN. MINISTA NA PASIFIK MAUSMAN, I SALIM BIKPELA TOK SORE NA GUTPELA TOK AMAMAS LONG WANPELA GUTPELA KIBUNG INSAIT LONG DISPELA TUPELA WIK.

BIKOS KANTRI BILONG MI I KISIM LUKSAVE LONG MAKIM PASIFIK LONG UNESCO EKSEKETIV BOD, MI LAIK KISIM DISPELA TAIM BILONG SALIM BIKPELA TOK TENKYU NA LUKSAVE I GO LONG OL MEMBA STET BILONG SAPOS OL I GIVIM LONG PAPIA NIUGINI LONG KENDIDET BILONG ILEKSEN INSAIT LONG NAMBA 36 SESEN BILONG JENERAL KONFRENDS LONG 2011.

LONG MAKIM GAVMAN BILONG PAPIA NIUGINI, MI LAIK GIVIM TOK AMAMAS NA LUKSAVE LONG YU LONG NUPELA WOK BILONG YU OLSEM SIA BILONG EKSEKETIV BOD NA AUTIM GEN BIKPELA SAPOT NA WOKBUNG BILONG MIPELA LONG YU.

EM I BIKPELA BILIP BILONG MIPELA OLSEM INSAIT LONG TAIM MIPELA BAI STAP LONG EKSEKETIV BOD, PAPIA NIUGINI BAI INAP LONG MAKIM GUT RIJEN INSAIT LONG DISPELA BIKPELA GRUP, WANTAIM OL STRONGPELA DVELOPMEN WOKMAK BILONG RIJEN.

LONG MAKIM MAUS BILONG RIJEN, PAPIA NIUGINI I TOK STRONGIM BIKPELA WOK NA LUKSAVE BILONG UNESCO LONG BIHAINIM WOK DVELOPMEN, WE EM I STAP LONG AS TRU LONG OLGETA BIKPELA PROGRAM NA WOK BILONG EN. OLSEM YU YET I SAVE, RIJEN I BUNGIM OL BIKPELA SALENS BIKOS LONG PLES EM I STAP LONG EN, NA OL KAIN KAIN DVELOPMEN MAK EM I GAT. MIPELA I BILIP OLSEM OL PASIFIK AJLAN KANTRI I MAS GO INSAIT LONG GLOBAL SISTEM NA MEMBASIP BILONG MIPELA LONG UNESCO EKSEKETIV BOD I GIVIM MIPELA DISPELA SANS.

OLSEM NA MIPELA I SAPOTIM STRONG WOK I KAMAP ANINIT LONG UNESCO WOK PROGRAM INSAIT LONG RIJEN, NA LUKSAVE LONG BILIP OLSEM DVELOPMEN LUKSAVE BILONG UNESCO I MAS STRONG MOA WANTAIM MOA LUKLUK LONG DVELOPMEN NA TU LUKSAVE LONG OL SPESOL KAIN HEVI OL SMOL AJLAN STET (SIS) I GAT, WANTAIM TU PASIFIK RIJEN.

INSAIT LONG OL DISPELA SEKSEN I KAM NAU, MI BAI TRAIM STORI LONG SAMPELA OL DVELOPMEN WE I MAS KAMAP LONG PAPIA NIUGINI, NA

TU LONG PASIFIK RIJEN.

A. OL HEVI BILONG KLAIMET SENIS
 SENIS LONG SINDAUN BILONG WIN NA REN BIHAINIM OL TUMBUNA LUKSAVE I WOK GIVIM BIKPELA HEVI LONG OL MAN. MAMA GRAUN EM MIPELA I SAVE LONG EN, EM I GUTPELA PREN, NA EM I WOK APIM MAK BILONG SOLWARA NA BAGARAPIM OL NAMBIS, BIKPELA TAIM NOGUT I KAMAP WANTAIM OL GRAUN BRUK NA HAINWARA I KAMAP PLANTI LONG OL SMOL AJLAN STET NA PASIFIK, NA TU LONG WOL. DISPELA I KAMAPIM BIKPELA BIRUA LONG LAIP NA SINDAUN BILONG PIPEL. WOK BILONG UNESCO INTAGAVMAN OSENGRAFIK KOMISIN BAI MAS STRONG MOA, WANTAIM LUKSAVE LONG PROMOTIM NA SAPOTIM OL MEMBA STET LONG OL STRONGPELA ELI WONING SISTEM.

B. LITERASI DVELOPMEN NA TISA TRENING PROMOSIEN: RAUSIM HEVI BILONG POVETI, OPIM MOA WOK NA SANS BILONG STRONGIM KANTRI.

MI LAIK TOKAUT TU OLSEM UNESCO EKSEKETIV BOD I REKOMENDIM LONG JENERAL KONFRENDS LONG SKELIM WOK BUNG PASIN I STAP NAU LONG OL KAIN KAIN UNESCO INTANESANEL INSTITUSEN NA OL ARAPELA SISTA NESENEL LEVEL INSTITUSEN LONG SAIT BILONG LITERASI NA TISA TRENING NA STRONG BILONG OL INSAIT LONG NESENEL DVELOPMEN INSAIT LONG DVELOPING WOL. MOA YET OL LIS DIVELOP NESEN NA SMOL AJLAN NESEN. OLSEM NA PASIFIK I SAPOTIM STRONG UNESCO KATEGORI 2 SENTA LONG TISA TRENING WE BAI SANAP LONG SRI LANKA.

C. MIDIA NA KOMYUNITI DVELOPMEN
 OL KOMYUNITI REDIO PROJEK EM I WANPELA BIKPELA DVELOPMEN LONG PASIFIK BIKOS OL I SAVE GUTPELA LONG OL PIPEL LONG OL LONGWE PLES. LIKLIK HALIVIM MANI BILONG PROJEK I KAM LONG IPDC I MAS KISIM SAPOT NA POROMAN LONG UNESCO HUSAT I KEN KISIM OL TEKNIKAL SAVE INSAIT LONG OL MEMBA KANTRI NA SANAPIM NA BILDIM WOK MAK LONG LOKOL LEVEL.

D. DAUNIM OL FIL OPISA - NA PROMOTIM KAPESITI BILDING LONG OL NESENEL KOMISIN LEVEL
 UNESCO BAI MEKIM STRONG WOK BILONG DAUNIM KOSTIM PROGRAM ADMINISTRESEN BILONG EN WE NAU I STAP LONG INTANESANEL FANDING SAPOT. WANPELA ERIA WE OPIS I GO

E. PATISIPESEN PROGRAM SAPOT
 DISPELA HAP BILONG UNESCO BAIENUAL DVELOPMEN PROGRAM EM I BIKPELA SAMTING TRU LONG OL MEMBA KANTRI BIKOS DAIREK FANDING EM I GO LONG OL WOK DVELOPMEN. OL POLISI NA GAIDLAIN I STAIM PROGRAM I MAS GAT GLASIM GEN LONG TRAIM SLEKIM OL STRONGPELA BANIS MAK LONG OL LAIN TURANGU NA OL LDC HUSAT I KISIM SUT TOK OLSEM OL I PAULIM MANI OL I MAKIM ANINIT LONG PP PROGRAM. MOA LONG DISPELA, PP MANI MAK I MAS GO ANTAP MOA INAP LONG USD200,000 LONG WAN WAN LDC NA SIDS BILONG GUTPELA NA STRONGPELA DVELOPMEN PROGRAM SAPOT.

F. PROMOTIM NETSERAL NA KALSAREL HERITES
 STRONGIM WOKBUNG NAMED LONG OL MEMBA STET LONG MENESIM NA BANISIM GUT SOLWARA NA NAMBIS BILONG PASIFIK, WANTAIM BIKPELA SAPOT I KAM LONG UNESCO IOC, OL WOKMAK I SANAP BILONG STRONGIM WOK SOLWARA SAIENS NA SEVIS LONG WAS LONG EN, SKELIM NA MENESIM OL SOLWARA RISOS WE I SUT LONG OLGETA PASIFIK AJLAN KOMYUNITI EM I KAIKAI GADEN BILONG OL OLGETA DE.

PASIFIK SOLWARA EM I GAT BIKPELA STRONG BILONG EN BILONG OL NETSERAL RISOS NA MALTI-NESENEL DVELOPA I RESIS LONG KAM INSAIT WANTAIM SOLWARA MAINING WOK. OL ENVAIRONMEN IMPEK STADI I KAMAP LONG OL INTANESANEL KAMPANI I GAT LAIK LONG WOK SOLWARA MAINING INTARES LONG GIVIM ROT BILONG DVELOPMEN I GO HET WANTAIM OL MAINING OPERESAN. OL GAVMAN INSAIT LONG PASIFIK I GIVIM TOK ORAIT LONG OL DISPELA KAMPANI LONG DVELOPIM OL MAIN ANINIT LONG TEKNIKAL STIA LONG OL RIJENAL ENVAIRONMEN OGENAISESEN OLSEM SOPAC. OL BIRUA NOGUT LONG LAIP NA SINDAUN BILONG OL PIPEL I NOGAT INAP LUKSAVE, NA WANWAN OL IMPEK PROJEK I MAS KISIM LUKSAVE INSAIT LONG JENERAL KONFRENDS LONG SAPOTIM AWENES NA WOK BILONG DAUNIM HEVI MAK BILONG OL BIRUA LONG OL GAVMAN BILONG PASIFIK.

TENKYU TRU

I GO AUT MAKIM MINISTA
 YORI YEI
SEKRETERI JENERAL

Liklik Bisnisman



Liklik brata Solomon Kanekane i helpim bikpela brata bilong Junia Joe Kanekane long salim ges. Foto Nicky Bernard.

Junia Kanekane helpim Renbo wantaim ges bilong kuk.

Nicky Bernard i raitim

GES bilong kuk em bikpela samting tru long ol bisnis haus na ol manmeri husat i gat ges stov bilong kukim kaikai bilong ol.

Joe Kanekane junia, em wanpela sumatin bilong Waigani praimer skul long Nesinel Kapitel Distrik, em statim dispela liklik bisnis bilong em long yia i go pinis.

Junia, wantaim famili bilong em save stap long Renbo, long avinun taim junia go pilai wantaim ol wan rot poroman bilong em, em save lukim ol mama o ol yangpela save karim ges botol bilong ol long go painim nupela gas long Gerehu o long Stop N Shop.

Dispela mekim Junia kisim tingting long statim dispela liklik bisnis bilong em long salim ges, long helpim ol lain

long noken go long wei nab aim gas.

“Mi save lukim ol mama na ol wan sais bilong mi karim gas botol na wokabaut go daun long Stop N Shop na baim bihain hat wok gen long karim na wokabaut kam antap. Dispela mekim mi belsore na tingting bilong long helpim na mekim liklik bisnis.” Junia Kanekane tok.

Junia go givim tingting bilong em long papa na mama bilong em, na dispela tingting bilong em i karim kaikai. Papamama bilong em i wanbel stret long tingting bilong Junia na tupela bungim mani na go baim geas bilong Junia.

Papamama bilong Junia statim em ov long 18-pela 4.5kg na 4-pela 13kg, dispela ol botol gas save pinis long tupela wik tasol, sampela taim wanpela wik na

Junia save go kisim nupela saplai bilong em.

Junia save mekim liklik profit taim olgeta gas bilong pinis, long 13kg Junia save kisim K57 na long 4.5kg em save kiisim K67. Bikpela samting Junia laikim em long helpim ol rot lain bilong em long noken wakabaut longpela rot long baim gas.

Mama bilong Junia, Rose Kanekane i tok em wanbel tru long pikinini man bilong em, em i tok dispela kain yangpela mangi stat bisnis long yangpela taim bilong em bai gat gutpela tingting long rotim bisnis bilong em yet long bihain taim.

Junia nau save sevisim 30-pela haus long strit o rot bilong em long Renbo long Gerehu. Prais bilong gas botol bilong em i wankain olsem ol narapela ges sevis lain long Mosbi.

Louma na Sanangke bin kamapim NGCB olsem beng

Aja Alex Potabe i raitim

NESENEL Geming Kontrol Bot (NGCB) i no bin mekim winmani tasol em i bin kamap olsem liklik beng o haus mani bilong ol poroman na wanwok bilong wanpela man tasol husat i bin ronim bipo gavman, Praitim Minista

Peter O'Neill i tok.

“Ol poroman bilong (Sir Michael) Somare tasol i bin bosim NGCB. Bot na menesmen i pulap long ol politikel wanwok na poroman bilong en tasol, na ol i bin yusim olsem wanpela liklik beng,” O'Neill i tok taim em i bin tokaut long ripot bilong wok painimaut kabinet i bin mekim i go insait long

olsem wanem NGCB i bin ron.

Gavman i bin kamapim NGCB aninit long Gaming Act 2007, na em i save lukautim pilai bilong kain gem bilong betim mani na pilai laki, olsem kasino, poka masin, loto na hos resis, insait long kantri.

O'Neill i tok bipo, ekting siaman Leonard Louma na Sif Eksekutiv Opisa (CEO), Simon Sanangke, i bin kisim dispela ogenesisen i go long rong hap olgeta.

“Menesmen na bot inap long yusim gut winmani i kam long NGCB, tasol ol i wok long yusim mani nating nating long laik bilong ol yet. Siaman na CEO i bin ronim dispela ogenesisen long laik bilong tupela yet. Nogat bisnis plen na nogat wanpela miting bilong bot save kamap,” O'Neill i tok.

Em i tok NGCB i no bin bihainim Gaming Act 2007 na Pablik Fainens (Menesmen) Act.

“Dispela wok painimaut i painim olsem bikpela pasin korapsen i bin kamap long NGCB na polis frot skwat na Investigesen Task Fos Sweep (ITFS) bai sekim Louma na Sanangke, na sasim tupela aninit long lidasip kod,” O'Neill i tok.

BUAI MAKET I BUNGIM TUPELA ROBERT

ROBERT Mandu em i wod memba bilong ples Samap insait long Turubu Lokol Level Gavman (LLG) eria long Wewak, Is Sepik provins.

Robert Kekendi i gat liklik bisnis bilong em

long salim buai nae m i bilong Toboga LL, Hagen Distrik long Westen Hailans provins.

Tupela man i bin bung long 2010 na wok patna long salim buai bisnis we tupela famili na komyu-

niti bilong ol i benefit o kisim gutpela helpim long en.

Bisnis bilong tupela i kamap gut tru i save kisim moa long K20,000 long wanpela raun bilong salim buai long en.



Robert Mandu (hankais) na Robert Kekendi (hansut) i gat gutpela as long smail o lap taim Wantok i kisim poto bilong tupela ausait Hokit Supamakot long Madang.



Position Vacant: Operations Manager

Our client is looking for an experienced Operations Manager to be responsible for their Port Moresby office. As part of an overall business organization, this newly created role will lead the combined functions, ensuring the safe and profitable delivery of key business outcomes and assisting with business developments. Candidate must demonstrate a professional approach to directing staff, with strengths in leadership, planning and effective communication, commonsense and be able to work well under pressure. Preferably a background in the police or military would be beneficial but not essential.

The following key attributes are required for the role:

- Able to manage day to day operation of the business
- Experience in staff management
- Providing assistance with the management of client relationships
- Able to manage rosters and timesheets
- Excellent time management and problem solving skills
- Experience in recruitment and general HR responsibilities
- Experience in managing company asset register

This is a permanent position with excellent remuneration for the right candidate who will be required to work autonomously.

Please send a cover letter and CV to:

The HR Manager
DFK Hill Mayberry Executive Placements
P.O Box 1829,
Port Moresby, NCD.
Or email to dfkhradmin@dfk.com.pg
Applications close on the 6 April 2012.

Ol mama long Garus lainim planti samting wantaim kokonas

James Kila i raitim

MOA long 170 lain mama grup bilong wod 20 we i karamapim Banab na Yoidik insait long Sum eria long not kos long Madang provins i bin amamas tru long stap insait long trening long wokim ol kain kain prodak yusim kokonas.

Dispela trening em wanpela komyuniti-bes ogenaesen, Garus Kokonat Prodaks Prosesing Grup (GCPPG) i pas long kamapim.

GCPPG em wanpela pikinini bilong ol long ples Banab yet i go pas long kirapim nem bilong em Yasum Madan

Yasum, husat i wok pastaim olsem wanpela treina wantaim PNG Kakao na Kokonas Institiut (CCI) i yusim save bilong em gut tru na wantaim gutpela tingting em i bringim trening i go daun long komyuniti bilong em long helpim ol mama insait long komyuniti long Garus eria long lainim gutpela samting long ples yet long kamapim gutpela sindaun insait long femili na komyuniti long ples.

GCPPG i kisim pepa o setifiket pinis wantaim Invesmen Promosen Atoriti (IPA) na tude dispela ogenaesen i ron gut long karimaut ol trening long wanpela risos senta bilong ol long Banap, we i stap samting olsem 15-kilomita longwe long Madang taun long not kos rot.

Yasum i wok bung wantaim ol teknikal ofisa bilong CCI olsem treina Peter Nguna wantaim tu ol arapela



Ol mama bilong wod 20 insait long Sum LLG long not kos long Madang i soim ol kokonat prodaks ol i wokim na kokonas i stap long fran.

patna ogenaesen olsem Pathfinders Intanesenel long Madang long go insait long givim skul na trening long ol mama long sait bilong komyuniti helt, toktok bilong jenda o wok namel long ol meri wantaim komyuniti, HIV/AIDS na ol arapela samting.

Dispela trening bilong ol mama we Garus Kokonas Prodaks Prosesing Grup

(GCPPG) i karimaut trening em AusAID i givim mani halivim long en aninit long Agrikalsa Inovesen Grent Skim (AIGS).

Planti ol mama bilong wod 20 long Sum LLG long not kos i amamas tru long trening bikos em i skulim ol long planti samting ol i ken mekim wantaim kokonas tasol.

Wanpela mauseri bilong ol mama bilong Banap na

Yoidik, Mulan Diau, husat i stap long trening i tok olgeta mama i amamas tru long lainim ol samting long trening ol

Dispela ol prodak ol mama i lainim long mekim wantaim kokonas em kokonat oil, bisket, kokonas sop, lousen o oil bilong waswan, kokonas noni sop na tu sakol, o bilak paiawut we yu ken yusim long kukim kaikai we paia i

save lait longpela taim.

"Mipela i gat liklik save long wokim wok, tasol long bung wantaim na mekim wok i strongim mipela ol meri"

Sampela mama i tok sampela taim ol papa i no save helpim ol, tasol ol yet nau i ken bungim kokonas, salim na kisim mani na helpim ol yet wantaim wanem ol samting ol i nidim long mekim ol prodak wantaim kokonas.

Ol dispela lain mama i bin soim ol prodak bilong ol long wanpela tim bilong Ramu NiCo Komyuniti Afes dipatment husat i bin mekim lukluk raun i go long Banab long lukim wok bilong GCPPG. Dispela raun em long luksave long wanem wok ol CBO i save wokim long strongim liklik developmen we i sapatim ol mama nap les na komyuniti.

Kirapim kakaruk Gavman mas sapatim agrikalsa

Kiki Kavana i raitim

SINGAUT i go ol manmeri insait long Pot Mosbi long lukaut long toksave long wok bung wantaim long kirapim kakaruk prosek insait long siti.

I gat tingting long mekim dispela kakaruk prosek wanpela bikpela prosek insait long Mosbi na tu long kantri.

Siaman bilong Mainland Holdings mama kampani bilong Niugini Tablebirds na Menesing Dairekta bilong Nesenel Developmen Benk, Richard Maru, i tok bikpela as tingting long kamapim dispela prosek em long daunim mani PNG save tromoim long baim kakaruk long ol ovasis kantri.

Long dispela taim, Mista Maru i tok Papua Niugini wok

long lukim 30 pesen bilong ol abus i kam long arapela kantri em kakaruk.

Dispela toktok i sapatim ripot Dipatmen bilong Agrikalsa na Laipstok i raitim long 2010 we soim olsem K2.9 milien em Papua Niugini i tromoim long baim kakaruk long ol arapela kantri- sampela i kam longwe tru olsem long ol Malaysia insait long Asia.

"Niugini Tablebirds i pasim tok long kamapim kakaruk prosek insait long Gerehu na long ol wik i yet long kam, bai mipela mekim pablik toksave long ol manmeri husat i stap long 8 na 9 mail long kam fowet na NDB ken luksave long yupela husat i gat pepa long groim kakaruk.

Bai NDB givim dinau long

kirapim haus kakaruk bilong yupela yet na stat long groim na salim kakaruk long ol stoa na pablik," Mista Maru tok long Tunde.

Mista Maru tok ol arapela kantri ovasis i no save baim kakaruk bilong PNG na em bilip gavman i givim bikpela sans stret long ol dispela ovasis kantri long mekim save long ol lokal manmeri husat i ken groim na salim kakaruk.

"Dispela kakaruk bisnis em bikpela bisnis sans long ol manmeri bilong PNG na i mas gat rait sapat long praivet, pablik sekta na tu long gavman long kamapim gut maket bilong mipela PNG yet bipo yumi tingting long salim abus i go long ol arapela kantri."

Aja Alex Potabe i raitim

AGRIKALSA em i namba wan samting we gavman i mas lukluk long en, bikos em i save sapatim laip bilong planti manmeri long kantri.

Maski ol wok manmeri i kisim potnait mani, tasol baksait long haus bilong ol, bai yu lukim ol i planim liklik kaikai long sapatim laip bilong ol.

Mosbi em i kapitel siti, tasol olsem wanem na ol manmeri i wok long mekim gaden na planim kaikai long maunten na arere long rot.

Memba bilong Telefomin, Peter Iwei i tok, maski yumi gat ol arapela risos olsem gol, kopa, ges na wel i stap,

em i bilip strong olsem agrikalsa em bikpela samting we gavman i mas sapatim bikos planti ol liklik manmeri na wok manmeri tu, i kisim strong long garden kaikai long lukautim laip bilong ol yet.

Em salensim gavman long putim moa mani long larim ol liklik fama o manmeri bilong planim kaikai o lukautim enimal long kisim dinau mani na kirapaim agrikalsa gen.

"Ol liklik fama long kain ples olsem Telefomin i nogat sans long kisim dinau mani long kirapim moa wok agrikalsa. Tasol ol hat long kisim dinau mani long beng. Dispela i minim gavman i givim baksait long ol liklik pipel husat i holim strong wok

agrikalsa," Iwei i tok.

Minista bilong Agrikalsa, Sir Puka Temu, i tok gavman i gat plen long sapatim ol liklik manmeri long bilong wok agrikalsa.

"Namba wan taim tru, O'Neill gavman i luksave long Nesenel Developmen Beng na givim K130 milian long en. Ol liklik manmeri husat i gat kopi na kakao diwai, planim vanilla o kabis, lukautim pig, kakaruk o pis i ken kisim dinau mani long NDB nau," Sir Puka i tok.

Em i tok aninit long lukluk bilong en, em i kamapim sampela polisi bilong karim NDB i go daun klostu stret long haus doa bilong ol pipel na larim ol kisim dinau mani long strongim wok agrikalsa.



Ramu NiCo givim fri medikol sekap na marasin long Basamuk

RAMU NiCo medikol tim long Basamuk Rifaineri long Raikos Distrik long Madang provins i bin karimaut fri medikol sek na tu i givim aweanes long sait long sik malaria na HIV/AIDS long ol viles na haus-lain klostu long rifaineri eria.

Dispela fri medikol sek na helt aweanes i makim Nesanel Maining Sefi Wik we i bin kamap long Mas 5 i go 11 long dispela mun.

Ramu NiCo Komyuniti Afes (CA) tim long Basamuk i redim ol aweanes progem long viles na long bik moning tru ol CA ofisa i go long ples Jangang na toksave long ol pipel na tu bilasim ples long Ramu NiCo medikol tim long go long hap.

Long samting olsem 8-kilok long moning ol manmeri na pikinini na tu ol skul sumatin i bung long wanpela ples aninit long mango long Jangang na i

harim ol skul toktok we nes-meri, Helen Bruno long Basamuk i givim long sait long sik malaria na tu long HIV/AIDS.

Em i tokaut stret olsem sik HIV/AIDS i no gat marasin olsem na ol manmeri i mas stap gut wantaim wanpela poroman o poromeri o noken slip wantaim arapela man o meri em i yu bungim namba wan taim tasol na tu em i tok-tok long rot bilong yusim kondom long abrusim sik.

Nes-meri Helen i givim sampela strongpela toktok i go long ol yangpela manmeri long lukautim na banisim ol yet long noken kisim sik nogut em HIV/AIDS.

Em i mekim sampela toktok tu long sait long sik malaria na wanem samting ol papamama i mas mekim long lukautim ol liklik pikinini bilong ol egensim sik malaria.

Tupela bikpela dokta bilong Ramu NiCo, husat i save stap wok long Basamuk em Dokta Pomuso Warima wantaim Dokta Chee i karimaut ol medikol sek. Planti ol liklik pikinini i sanap long lain long go lukim ol dispela dokta long tupela i sekim bodi bilong ol long sain bilong sik malaria o arapela ol sik.

Sampela ol pikinini we i gat sik em ol dokta i givim marasin long ol long karim i go long ples.

Tupela dokta tu i sekim yau, bros, ai na ol narapela eria long bodi long sekim gut sapos ol pikinini i sik stret na ol dispela we sik bilong ol i no bikpela ol i givim marasin. Ol we i gat bikpela sik em ol dokta i raitim ripot na ol i ken kisim priskripsen na karim i go long bikpela hausik long taun long kisim marasin.

Taim tupela dokta i go het

long sekim ol pikinini na ol el-ementeri skul sumatin bilong Mindre na Ganglau, Nes-meri Helen i go het long givim skul toktok long rot long abrusim sik HIV/AIDS na tu sik malaria.

Planti ol manmeri bilong ol ples na tu ol setelmen arere long Ganglau husat i go kisim ol fri medikol sek na tu kisim marasin i tok amamas tru long Ramu NiCo long mekim kain aweanes program i go insait long ol komyuniti klostu long Basamuk rifaineri.

Ramu NiCo bipo i bin mekim kamap kain helt awaranes long ol asples arere long Ramu Riva na ol narapla asples long Kostol Paiplain, Inlen Paiplain, Basamuk na Kurumbukari. Long ol displa raun, Ramu NiCo i wok wantaim ol dokta lain bilong Walium stesin.



Ramu NiCo medikol ofisa, Dokta Warima givim helti skul toktok long rot long banisim sik malaria long ol pikinini wantaim wanpela mama long Jangang



Ramu NiCo medikol tim wantaim ol CA ofisa long Jangang viles



Dokta Chee bilong Ramu NiCo i sekim wanpela elementeri skul sumatin bilong Mindre



Dokta Warima sekim tit bilong wanpela pikinini long Jangang



Nes-meri Helen Bruno givim toktok long banisim HIV/AIDS na CA ofisa Dubam i saptim long sait i stap.

RAMU NICO **Ramu NiCo redi long givim**
 Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.
 Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'



AMAMAS: Oi Mungkas i bin amamas long win bilong ol agensim Yamaros long Mosbi long Mas 17 tasol ol i no bin amamas tumas taim ol i lus long Barra FC long Lae long NSL resis bilong ol meri. POTO: Nicky Bernard.



PAIT MAN: Alfred Samuel i sanap wantaim tim mensesa bilong em, Noreen Kili Raymaster. Samuel bai go pait long wanpeal Muay Thai pait long Sydney long Epril na i tok em i redi tasol long bungim birua bilong em. POTO: Andrew Molen.



PUTIM LEK: Wanpela pilai bilong Central i traim long rausim bal long birua bilong em bilong Tukoko Uni long raun 21 NSL gem bilong ol las wik Sarere long Mosbi. POTO: Andrew Molen.



SOIM HAN: Shane (Iephan), Danielna Naomi save laik werim han glav bilong ankol bilong ol na pilai wantaim. POTO: Andrew Molen.



Mama bilong Snuka

BILIAD (billiards) em i mama bilong snuka na pul.

Snuka, pul na planti arapela spot olsem ol, i kamap long biliad. Dispela em i gem we tupela pilaia i save sutim ol bal antap long wanpela tebol we i gat hul o poket long ol kona bilong en.

Astingting em long sutim ol dispela bal wantaim wanpela stik o kyu (cue), i go insait long dispela ol poket. I gat ol tebol, stik na bal bilong dispela gem yet we ol i save pilai insait long haus tasol.

Biliad em i mama nem tasol i gat planti kain biliad i stap olsem, Inglis Biliad, Frens o Carom Biliad na poket biliads o pul.

Histri bilong gem

Biliads o Inglis Biliads, i kamap pas long Gret Briten.

Tripela gem bilong bipo, ol i kolim "the winning game", "the losing game" na "the carambole game", i bung wantaim long kamapim biliads.

Insait long "winning game", ol i save pilai wantaim tupela wait bal.

Astingting em bilong wanpela pilaia long sutim bal i go hapsait long tebol tasol dispela bal i noken paitim raba banis long hapsait bilong tebol.

Husat i mekim dispela bai kisim sans long sut pas long traime na winim ol poin.

Pilaia husat i sutim bal bilong narapela pilaia i go insait long poket bai kisim tupela poin.

Wankain loa i stap insait long biliad long nau.

Long "Losing game", wanpela pilaia i ken winim tupela poin sapos em i sutim kyu bal o wait bal i go insait long poket wantaim stik na wanpela samting ol i kolim "carom," bihain long dispela bal i go paitim wanpela bal bilong narapela pilaia.

Insait long "carambole" gem, ol i putim wanpela repela bal i go wantaim dispela tupela wait kyu bal.

Astingting em long sutim wait bal i go paitim ret bal na wanpela bal bilong narapela pilaia na go insait long poket bipo long yu winim tupela poin.

Total poin bilong wanwan long dispela tripela gem em long winim 12 poin.

Dispela tripela gem i bin kamap strong insait long Inglen long 1770's tasol nau tripela wantaim i bung long kamap biliads.

Wanwan samting olsem loa na stail bilong pilai stap insait long biliads na total poin bilong win nau em 16 na i no moa 12 olsem bipo.

Biliads long PNG

Biliads na snuka long PNG i stap aninit long PNG Billiards and Snooker Association.

Ol i save gat kompetisen olgeta wik olsem ol arapela spot na tu ol nesanel na intanesanel tonamen bilong ol olgeta yia.

Stail bilong pilai


Ol samting bilong pilai biliad i wankain tasol olsem long snuka na pul.

Wanwan loa bilong pilai i no wankain na ol bal tu i gat wanwan kala bilong ol yet long wanwan gem tasol save na stail bilong yusim stik long sutim bal i go insait long poket, em i wankain tasol.


Sapos yu save long pilai biliad o snuka, em bai yu nap save tu long pilai pul na ol arapela gem olsem tu.



MAKIM: Wanpela pilaia i redi long brukim ol bal long statim gem.



TEBOL: Ol ples bilong ol samting long stap antap long biliad tebol long taim bilong pilai.



STIK: Hia em ol hap bilong han bilong kyu stik we ol pilaia i save yusim long sutim bal.



PILAI PLES: Biliad i save kamap insait long wanpela haus we i gat inap lait antap long tebol, na inap spes bilong holim ol stik long sutim bal.

SPOTS DRO

RAUN 5

MAS 30-EPRIIL 26 2012

FRAIDE GEMS

AAMI Park

Storm **Vs** Knights

Suncorp Stadium

Broncos **Vs** Dragons

SARERE GEMS

Mt Smart Stadium

Panthers **Vs** Sharks

Parramatta Stadium

Eels **Vs** Sea Eagles

SFStadium

Roosters **Vs** Warriors

SANDE GEMS

Skilled Park

Titans **Vs** Bulldogs

Sydney Cricket Ground

W/Tigers **Vs** Rabbitohs

MANDE GEM


Canberra Stadium

Raiders **Vs** Cowboys

Raun 3 Poin Leda

	Tim	W	L	D	B	+/-	Pts
1.	Storm	4	0	0	0	48	8
2.	Bulldogs	3	1	0	0	43	6
3.	Broncos	3	1	0	0	24	6
4.	Dragons	3	1	0	0	20	6
5.	Panthers	2	2	0	0	7	4
6.	Warriors	2	2	0	0	-1	4
7.	Raiders	2	2	0	0	-8	4
8.	Cowboys	2	2	0	0	1	4
9.	Knights	2	2	0	0	-2	4
10.	Sea Eagles	2	2	0	0	-3	4
11.	Sharks	2	2	0	0	-4	4
12.	Roosters	2	2	0	0	-6	4
13.	Rabbitohs	1	3	0	0	-10	2
14.	Titans	1	3	0	0	-18	2
15.	W/Tigers	1	3	0	0	-27	2
16.	Eels	0	4	0	0	-64	0

Paik bilong Smith na Buderus



OL Melbourne Storm i wok long redi long bungim Danny Buderus taim ol i pilaim ol Knights long Fraide nait.

Tasol bikpela paik insait long dispela gem bai kamap namel long huka bilong Storm, Cameron Smith na Buderus.

Tupela i save salens long werim namba 9 jesi bilong Australia bipo long Buderus i lusim NRL na i go pilai wantaim Leeds Rhinos long In-glen Supa Lig resis long las tripela yia.

Buderus, 34 krismas, I kam bek long ol Knights long dispela yia na las wik em i soim stail bilong em gen taim em i kisim Man-of-the-Match awod long gem bilong ol las wik agensim ol Bulldogs we ol i win.

Dispela gem i lukim em i gat sans long kisim ples insait long NSW sait gen long Stet ov Orijin.

Kosa bilong Storm, Craig Bellamy i bilip huka bilong em, Smith, husat tu i kamapim wanpela strongpela gem las wik long helpim ol i winim ol Roosters las wik, bai givim strongpela salens gen long Buderus.

"Tupela i save gat gutpela salens

namel long ol yet olgeta taim olsem na mi save wankain bai kamap gen long Fraide nait," Bellamy i tok.

Dispela Fraide bai namba wan taim bilong dispela tupela pilaia i salens gen bihain long tripela yia taim Buderus i no bin stap pilai long NRL.

Bellamy, husat i bin kosa bilong

Buderus long Blues tim long Stet ov Orijin, i tok em i wanpela pilaia husat i save pilaia strong tru na krismas bilong em i no senisim stail na gem bilong em.

Em i tok Buderus i pilai gut tru long las wik na i bilip em bai givim wankain strongpela salens long ol tu.

Merrin redi long go insait long Blues tim

TRENT Merrin i gat wanpela tingting tasol taim em i go insait wantaim ol Dragons long bungim ol Broncos long Fraide nait.

Dispela tingting em long traime na winim bek ples bilong em insait long Blues skwat bilong dispela yia.

Merrin i bin stap insait long Blues skwat long gem wan na tu bilong Stet ov Orijin long 2011 tasol ol i no bin kisim em bek long em tri.

Nau, em i gat wok long traime na winim ples bilong em gen insait long tim.

Em i laik mekim dispela agensim ol fowet bilong Broncos long Fraide nait.

Merrin i statim gut sisen bilong em wantaim ol dragons pinis na em i laik go moa yet.

Em i tok astingting bilong em long pilai strong em isi.

"Ol i gat wanpela bikpela fowet pek we planti long ol i makim Australia na Kwinnslen pinis," Merrin i tok.

Broncos fowet pek i gat ol kain pilaia olsem Petero Civoniceva, Ben Hannant na Sam Thaiday husat i ken kamapim bikpela salens agensim ol fowet bilong ol Dragons na Merrin i



YUPELA KAM: Merrin i wok hat long kisim bek Blues jesi bilong em..

redi long go pas long bungim ol.

"Taim yu laik traime save na strong bilong yu, em i gutpela long yu mekim dispela agensim kain ol pilaia olsem.

"Ol bai kamapim kain

strongpela gem olsem long Fraide nait olsem na em bai wanpela gutpela gem tru," Merrin i tok.

Em i tok em i laik go insait gen long Stet ov

Orijin na dispela i mekim em i laik pilai strong moa.

"Taim yu pilai Stet ov Orijin pinis, yu bai laik long pilai long hap gen, em i tok.

Ol skul i ken winim samting bilong pilai

Andrew Molen i raitim

OLGETA skul i save laikim spots tasol i no olgeta i gat ol samting bilong pilai olsem ol bal, bet, net na ol arapela.

Sapos ol i gat inap mani, ol i save baim, sampela taim ol i save kisim long ol helpim i kam long ol spona na sampela taim ol i save stap nating tasol.

Wanpela rot long ol skul i ken kisim ol dispela samting em long wokbung wantaim ol arapela bikpela kampani na spona husat ol i ken long helpim ol.

Dispela kain ol wokbung i kamap nau wantaim City Pharmacy Limited (CPL) we ol i kolim "Sports for Schools" o Spots bilong ol skul, program.

CPL i go pas long displea program tasol i gat planti ol arapela spona i stap insait long en tu.

Astingting bilong dispela program em bilong ol skul long kisim planti ol samting bilong spots bai planti moa long ol sumatin bilong ol i ken stap insait long spots.

Dispela program bai lukim wokbung bilong ol mama papa, ol sumatin na ol skul bilong ol na i op long ol

praimeri na sekenderi skul wantaim.

Long win, yu mas baim ol samting bilong Trukai, Flame Flour, Ox & Palm, Coca Cola, Rexona, Digicel, Kellogg's, Zenag na SPC.

Taim yu baim ol samting inap long K10, em yu kisim wanpela poin pinis, sapos yu baim inap long K20, em yu gat tupela poin pinis, na i go olsem.

Hamas poin yu bungim bai nap long wanem samting yu i ken kisim long CPL.


Ol poin i stat long 250 poin (bilong wanpela set wara botol) i go bai nap long 1500 poin (bilong wanpela kriket

set).

Bungim olgeta risit pepa na kisim i go long skul husat ol bai givim i go long CPL long kisim ol spots samting bilong ol.

Dispela program i stat long Mas 26, dispela yia na ol wokmanmeri bilong CPL i wok long raun long ol skul na givim ol pas na rejistresen pepa long ol.

Husat i laikim dispela ol rejistresen pepa long stap insait long dispela program o long save moa, i ken ringim 312 0101, 312 0103 na 312 0105 o salim emel long marketing@cpl.com.pg o anthony@cpl.com.pg.



WOKBUNG: Maketing Menesa bilong CPL, Prue Go (namel) wantaim ol manmeri bilong ol Digicel, Trukai, Goodman Fielders, Rexona, Coke, SPC, Mortein, Ox & Palm na Zenag. POTO: CPL.



Ol tim bai lukim gutpela samting long 2012 PNG Gems

I GAT planti gutpela senis bai kamap long planti ol provinsol tim long PNG Gems dispela yia long sait bilong ol wok redi na pilai bilong ol.

Wanpela askim yu ken givim em, wanem ol dispela senis ol provinsol tim bai nap long lukim.

Ol senis olsem sait bilong wok redi, strongpela pilai na resis bilong ol long taim bilong gem na ol arapela samting long mekim long pinis bilong gem.

Ol bai nap long lukim ol dispela senis long ol wok redi bilong ol yet bipo long ol i go pilai.

Gem i bin stat long 2003, na inap long nau, planti ol tim i luksave na lainim long ol asua bilong ol long bipo pinis na nau ol bai nap long mekim ol senis long helpim ol yet.

Dispela ol senis bai kamap long ol wok bilong ol long lukautim na ogenaism ol etlit na ofisol bilong ol.

Ol ofisol na etlit em ol namba wan lain tru long lukautim gut insait long tim olsem na gutpela wok i mas kamap tu long makim ol manmeri husat i nap tru long mekim ol dispela wok na pilai.

Wanwan tim tu i mas i gat inap taim long kisim na trenim ol pilaia bilong ol bipo long gem.

Ol teknikal ofisol bilong wanwan spot tu i mas kisim gutpela lukaut olsem ol etlit bilong ol.

Gavman bilong wanwan provins i mas helpim ol tim bilong ol tu long ol wok redi na wokabaut bilong ol i go long dispela gem.

Em i wok bilong ol tu long helpim tim bilong ol bilong wanem tim i karim nem bilong provins na sapos ol i no redi gut na i go bai nem bilong provins i bagarap.

Wankain i go long ol arapela manmeri na spona husat i laik helpim ol tim bilong ol.

Sapos tim i no redi gut bipo long ol i go long gem, em bai ol i no inap pilai gut tumas.

Wok redi bilong ol em i bikpela samting tru.

Pasin na pilai o wokabaut bilong ol etlit insait na autsait long pilai graun tu em i bikpela samting.

Dispela em bilong wanem pasin na wokabaut bilong ol bai soim respek i go long Gavman na ol manmeri husat i helpim long kamapim na redim tim bipo long ol i go long pilai.

Pilai bilong ol insait long gem bai soim wanem kain ol teknikal manmeri ol i kisim long tim long skulim na trenim ol.

Wankain luksave bai kamap long ol ofisol bilong tim long stap na lukaut bilong tim long taim bilong gem.

Wok bilong ol etlit na ofisol long gem em long pilai strong tasol sapos ol i win ol lus, em i stap wantaim ol yet sapos ol i gutpela i nap o nogat.

Dispela i go tu long klostu long pinis bilong gem.

Klostu long pinis bilong gem em i taim we olgeta ofisol i mas redi gut na stap bilong wanem dispela em i taim we planti ol ofisol i save laik raun na mekim nating.

Sapos olgeta samting i pinis na ol ofisol i no redi gut long dispela taim, ol bai lukim ol etlit i mekim planti samting nogut.

Long dispela as, olgeta ofisol i mas redi na i gat ol plen bilong was long ol etlit bilong ol bihain long gem i pinis.

Nupela Vipers...

i kam long bek pes..

bungim ekspirians na yut bilong ol insait long gem," Guru i tok.

Tim i amamas tu long holim bek sampela ol sinia pilaia olsem Eki Ene, Elijah Riyong, Josiah Abavu, Bobby Mori, Sebastian Pandia na ol arapela olsem.

Senta bilong Hela Wigmen long 2011, Larsen Marabe tu i kam insait long tim dispela yia na bai putim sampela strong long atek bilong ol.

"Ol pilaia i save stap long Mosbi tasol olgeta i kam long wanwan ples na provins insait long kantri tasol olgeta pilai olsem wan-

pela tim tasol aninit long nem bilong Vipers.

"Mipela i amamas long tokaut olsem dispela i soim tru pasin bilong bung na stap gut wantaim," em i tok.

Vipers skwat bilong dispela yia em: Josiah Abavu, Richard Kambo, Atte Bina Wabo, Bobby Mori, Adam Korave, Enoch Maki, Stargroth Amean, Israel Eliab, Samuel Koim, Larsen Marabe, Sebastian Pandia, Noel Joel, Elijah Riyong, Peter Paulus, Dick Nap, Tony Dai, Timothy John, Toua Kohu, Kevin Frank,

Roger Laka, Leroy Kume, Steven Johns, Stanley Torato, Eki Ene, Sebulon Ragi Jr, Philip Kumiye, Tim-

othy Komane na McKendry Kandi.

Guru i tok tu olsem Stop 'N' Shop i amamas long kam bek gen olsem mama spona bilong ol Vipers.

Stop 'N' Shop, we i wanpela bikpela supa maket stua insait long Mosbi, i tok ol i luksave na i amamas long Vipers olsem tim we i save karim tru nem bilong Mosbi siti insait long dispela bikpela resis.

Guru i tok em i no isi long wanpela man, meri o kampani sponsaim wanpela tim bilong wanem em i kos bikpela mani, tasol Stop 'N' Shop i soim bilip long tim na ol i amamas long dispela sapot.

Dispela bai namba tri yia bilong Stop 'N' Shop olsem mama spona bilong tim na ol i bilip tim i gat planti moa gutpela samting long insait long gem bilong ol.

Kos bilong ronim klap i wok long go antap na nau ol i save putim K800, 000 long lukautim tim long wanpela yia tasol.

Vipers i no nupela long ragbi lig long dispela level, na ol i soim ol spona na sapota bilong ol long las yia olsem ol i ken mekim gut yia bihain long ol i pinis long semi failon resis long 2011.

Menesmen i bilip, tim bai go antap moa yet wantaim gutpela spona na sapot bilong ol manmeri tu.

NEW PREMIUM TUNA

DIANA

PROUDLY PNO MADE

DIANA Hot & Spice
DIANA Smoked Salmon
DIANA Tuna with Oil
DIANA Tuna with Sauce
DIANA Barbecue Flavour

Nupela Vipers

Planti nupela pilaia wantaim moa stail na spit

Andrew Molen i raitim

NUPELA tim bilong ol Vipers i planti ol nupela pes insait long en, tasol long wankan taim planti ol ekspiens na sinia pilaia i stap tu. Menesmen bilong Vipers i bilip olsem dispela bai kamapim gutpela wokbung namel long ol nupela na olpela pilaia na i kamapim nupela kain stail bilong gem we bai nap long strongim ol. Long Mande dispela wik, siaman bilong Vipers, Sudhir Guru i tokaut long nem bilong ol pilaia husat bai stap insait long tim dispela yia.

I gat 28 pilaia long tim we ol i kisim bihain long ol i pilai traiel gem long las tripela wik. "Mipela i stat wantaim 52 pilaia na katim i kam daun long 28. "Dispela tim i gat planti ol nupela na olpela pilaia wantaim we bai lukim ol i

Moa long Pes 39.

OL I KAM: Ol Vipers i redi long pilai strong gen dispela yia anit long nem bilong mama sponsa, Stop 'N' Shop.

PHOTO: ANDREW MOLEN

Johnston's Pharmacies

For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.

All Sport and First Aid requirements.

P.O.Box 1066 Boroko. Phone 325 3185. Fax 325 0190. Email sales@johnstons.com.pg."